

UTL AT DOWNSVIEW



D RANGE BAY SHLF POS ITEM C
39 10 10 06 11 025 9

DR Sa'īd Pāṣā, Mehmed
558 Sa'īd Pāṣānın Kāmil Pāṣā
K34S3 hātirātina cevābları

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

۸
۷
۱
سید محمد نایب خان
کامیل نایب خان

۱
شرقی روم ایلی : مصر دار فنی مستدری

EAST PASADENA KAMIL PAS



استانبول : طنین مطبعه سی

۱۳۲۷

سید سعید پاشا

کامل پاشا خاظر الیخواری

شرفی روم ایلی ، مصر دارمینی مستدری

Sa'īd Pāṣā, Mehmed, 1838-1910


Sa'īd Pāṣānin Kāmil Pāṣā
hātīrātına cevābları



استانبول : طنین مطبعه سی

۱۳۲۷

DR
558
K3453



1030612

صدراسبق کامل پاشا حضر تلرینک خاطراتی - که مصمیت
نشری بر قایچ آیدن بری وسائط مطبوعاتله متوالی الاعلام
ایدی - بوراده بولندیغم ائشاده موقع ظهوره کلدیکندن عودتمده
آلوب او قودم . خاطراتک صحائف عدیده سنده بکا عائد فقره لر
بولندیغندن بو حال بنمده بیان احوال وافکار اتمه می ایجاب
ایتدیر مشدر . بحثه کیرمه دن اول شونی سویلیه یم که معروضات
شفاهیه و خصوصیه ایله مسلکمی تنقید ایتک کامل پاشا حضر تلرینک
ملزملری بولندیغنی مأموریت و معزولیتلرم ائناسنده ایشدر
ایدم . رأس امورده بولنا نلرک وظیفه لری تصادف ایتدک لری
مصالحده و خصوصا مسائل سیاسیه ده حقیله تدقیقات اجرا
ایتمکسزین ویالکز حال حاضر اعتباریله دکل مستقبلات ایچونده
غایات و نتایجی تأمل ایتمکسزین دولت متبوعه نامنه تعهدات
و معاقد اتدن اجتناب ایتمکدر . بومهمه یی عاجزانه مسلک اتخاذه
ایتمش و هر حال وزمانده بودولتک اسباب سلامتنه حصر فکر
ایدنلردن بولنش اولدیغمدن کامل پاشا حضر تلرینک حقمده
عدم حسن ذهابلرینی سحیه درایت و نصف تریله توفیق ایده مزدم .

بناءً عليه روايات واقعه نك سخته شمدي به قدر قائل اولما شدم .
 حيفا كه مشار اليه ك خاطر اتنده كوريلان عريضه خصوصيه
 ومقالات مخصوصه لر ينك بعضارى اوروايتلرى تصديق ايتدى .
 مع مافيه بن بوكا متشكر اولدم . زيرا حسن ظنك ناهمحل
 اولديغى آكلامق وسيله تصحيح خطا واوايسه شكرانه
 سزادر .

صده كلنجه ، بكادائر يازيلان شيلر قرين صحت اولمديغدن
 صحيحى بيلديرمك لازم كليور . فقط دوچار اولديغ رثه
 عضليه نك اشتدادى سبيله مضطرب بولنديغمدن كايلىق
 تشرىحاته قدر تياب اوله ميه جغم . ذاتاً دخى بقيه وقايع خاطراتك
 بوندن صكره نشر اولنه جق جزؤ لرنده كوريله جكندن شمديلك
 محملاً تمهيد حقايق ايده جكم . كامل پاشا خاطراتك ايلك
 صحيفه سنده ديوركه : « شرقى روم ايلينك بلغارستانه برلشديرلمسى
 ايجون ادرنه ولايتى جوارنده وقوع بولان حركات واجرا آتدن
 باب على بى خبر اولديغى حالده صوفيه ده بولنان روسيه پولتيقه
 مأمورندن اوروپا طريقه در سعادت سفارتنه ليلاً ورود ايدن
 برتلغرافنامه دن حاله كسب وقوف ايليان سفير موسيو نه ليدوف
 در عقب مقام سلطنته عرض معلومات ايلسى اوزرينه وقعه دن
 متأثر اولان خاقان سابق بايرام نمازينه چيقد يغنده صدر اعظمه
 اظهار شدت ايلدى . »

اولا بلغارستانده جريان ايدن احوال دن باب عالينك بى خبر

بولندینی ادعاسی موافق حقیقت دکلدر . ۳۰۱ سنه سی ایلولندن
اول بلغارستانده بولنوب عددلری غایت قلیل واکثریت
کندیلرینه تماماً معارض اولان ارباب اختلال ایکی ایالتک اتحادی
یولنده بعض تشبثاتده بولنملری وروسیهده پانسلاویزم فکرینه
خدمت ایدنلره استناد آثاری محسوس اولسی اوزرینه روسیه
حکومتی نزدنده باب عالی پک مؤثر تشبثاتده بولندیغندن حکومت
مشار الیها ایکی ایالتک اجتماعی آرزوسنه قطعاً مخالف اولدیغنی
قونسلوسی وساطتیه شهرک هر طرفنده مطبوع بیاننامه لر تعلیقیه
اعلان ایتیش ایدی . تفصیلی خاطراتمک برنجی قسمندنده
اکلاشیلیر .

ثانیاً روسیه سفیرینک اوروپا طریقیه سفارته لیللاً ورود
ایدن تلغرافنامه دن وقعه اخیره یه کسب وقوف ایتدیکی بنم فکرمه
کوره قبل التدقیق تصدیق اولنور بر قضیه دکلسهده آلدیغنی
تلغرافدن خاقان سابقه معلومات ویرمسی استبعاد اولنه مز . فقط
باب عالی سفیرک خبری اوزرینه دکل دهها اول حالی استقصا
ایدرك مقام سلطنته بیلدیرمش ایدی . آتی الیان مخبرات بونی
اثباته کافیدر :

تذکره خصوصیه معروضه

« روم ایلی شرقیه دائر بوکون تقدیم قلنان تذکره جوابیه
عاجزانه منطور عالی حضرت پادشاهی اوله رق وارنه طریقیه روم ایلی
شرقی والیلکندن وقومیسر نهاد پاشادن ودریغالسکی پاشادن اخذ

معلومات صحیحہ ایلہ عرضی ادادہ بیورلدیغتی حاوی تذکرہ خصوصۃً والائری آئندی . اولکی تذکرہ بیان اولندیغی وجهله هوجه بك طریقله غوریل پاشادن استشعار حال اولنمشیدی . هوجه بك طریقته مراجعت اولنسی استانبولله وارنه آره سنده بحرأً تلغراف قابلو سی اولیوب برأً وارنه واسطه سیله تلغراف کشیده سی ایسه شو حالده قابل اوله مامسندن نشأت ایتشدیر . نهاد پاشایه کلنجه دونکی کون بو خبرك آئمنسی اوزرینه نظارت خارجیه دن آکاده تلغراف چکیلهرك مشارالیهك معلومات وحسیاتی سؤال اولنمش وبرده بوشیلرده بلغارستانك تحریکاتی وار ایسه اولبایدہ امارته اجرای اختارات ایلمسی دخی مشارالیه نهاد پاشایه توصیه قلمش ایدی . بوساعته قدر مشارالیهك جوابی آئندی . ورودیلہ برابر عرض اولنه جغی بدیہی اولمغله وسفارتلردن سؤال کیفیت دردست بولمغله عتبہ سنیه ملوکانه یه عرضی متمنادر افندم .

فی ۹ ذی الحجه ۳۰۲ وفی ۷ ایلول ۳۰۱

دیگر تذکرہ خصوصیه

« فلبیه دائر پارسدن چکیلان هواس تلغرافندن بحثله روسیه سفارتخانه سندن هان اخذ معلومات اولنهرق عرض اولنمنسی اراده بیورلدیغتی حاوی تذکرہ خصوصۃً علیهلری دخی آئندی . سفارتلردن سؤال حال ایچون بیوکدریه کوندرلش اولان تحریرات خارجیه کاتبك [۱] ورودینه انتظار اولنمقده اولدیغی کبی کندوسنه ابتدا روسیه

[۱] او وقت تحریرات اجنبیه کتابتنده الیوم پارس سفیری اولان نعم پاشا بولنیور ایدی . مشارالیهك بایرام کیجه سی سفرا ایلہ وقوع بولان ملاقاتی اوزرینه یاپدیغی راپور بایرام کونی عقد اولنان مجلس وکلاده اوقونمش ایدی . بوماده دخی خاقان سابق روسیه سفیری واسطه سیله وقعیه مطلع اولدیغی وباب عالینك بی خبر بولندیغی حقنده کی افاداتی جرح ایدر .

و آوستریا ایلچیلرینی و بعده دیگر سفرانی کورمسی و استحصال ایده جکی معلوماتی قابل اولدینی حالدده بیوکدره دن تلغرافله یازمسی و عودتنده دخی تفصیلاتی و یرمسی توصیه اولنشدی ، آله جفی معلوماتک عقیب ورودنده عرضه مسارعت اولنه جفی بدیهیدر . خارجیه ناظری حضرتلری دخی دعوتله دونکی کون نهاد پاشایه چکیلان تلغرافک جوابی تعبیلاً پاشای مشار الیه و صوفیه دن آله جق خبرلری بیلدیرمسی ضمننده بکرش . سفارت سنیه سنه دخی تلغراف کشیده اولنشدر ائندم »

۹ ذی الحجه ۱۳۰۲

دیگر تذکره خصوصیه

« لورد سالسبوری طرفندن در سعادت انکلتزه سفارتنه کلان تلغراف صورتی و اولبایدیه کی تذکره علیه لری دخی مطالعه اولندی . تذکره اخیره عاجزیده بیان اولدینی اوزره بیوکدره کوندریلان تحریرات خارجیه کاتبک روم ایل شرقیه دائر سفارتلردن استحصال ایده جکی معلومات عقیب ورودنده عرض اولنه جفی کبی بلغارستان پرنسینک فلبیه حرکتی صحیح اولوب اولدینی همان یازمسی نهاد پاشایه و صوفیه دن آله جق خبرلری بیلدیرمسی دخی آبروجه بکرش سفارت سنیه سنه بیلدیرلشدر مشارالیه نهاد پاشادن نه بواسطه یاضاحک نه ده بوشیلر بلغارستانک تحریک و مدخل اثری اولدینی حالدده امارته و هیئت مدیرانه اجرای اختارات ایلمسی حقنده ده اولجه چکیلان تلغرافنامه نک هنوز جوابلری آله مامش ایسه ده مشار الیه نهاد پاشادن رأساً کلوب خارجیه نظارت جلیله سنک تذکره سیله برابر ترجمه لری لفاً تقدیم اولنان ایکی تلغرافک مال و مدلوللرینه نظراً احوال واقعه هیئت و کلاجه مطالعه یه محتاج کورندیکی کبی ادرنه والیسی حضرتلرینک بوکون آلمان تذکره دولترلنده دخی حکایه اولنان اشعارندن مستبان اولدینی وجهله شرقی روم ایلدن ادرنه حدودینه عسکر سوق اولنسی اوزرینه ولایتجه تدابیر احتیاطکاری یه ابتدار قلندینی اکلشیله یور

ایسه ده تدابیر مذکورہ نك كفايت وعدم كفايتك هيئت عسكرى به چه
تعيينى لازمه دن بولمشد . برلين عهدنامه سنك اون آلتنجى ماده سنده
شرقى روم ايلي ايالتنك امنيت داخله وخارجيه سى تهديد اولندينى تقديرده
عسا كر عثمانى يى جلبه والينك حق اوله حق وبويله بر ماده نك وقوعنده
باب على اولبايده ويريلان قرارى واسباب موجب سنى استانبولده كى
سفر اى اجنبى به يلايره جكدرديه محرر ايسه ده والى طرفندن اوليله
بر طلب واقع واستشمارات واقع نك جوانى وارد اوليوب نهاد پاشانك
اشعاراتنده غوريل پاشانك اسقاطى مروى اولدينى مندرج بولنديشندن
يارينه قدر دها سائر معلومات استحصا لاولنور ايسه آنلك دخى
علاوه سيله نه ياييلمق ايجاب ايد جكنك بعد المعايده مجلس وكلاجه تدقيق
ومذاكره سى ايجاب حالدن كورونمكله عرضى متمنادر افندم .»

۹ ذالحيجه ۳۰۲

وقعه نك حدودى عرفيه مصادف ومجلس وكلائك عقدى
آتيده تفصيل اولنه جنى اوزره اصرارم اوزرينه بايرامك برنجى
كونى واقع اولوب مع مافيه بومدت آراسنده صدارت دائره
عسكرى به وشرقى روم ايلي واليلى ايله ادرنه ولايته وولايات
سائره متجاوريه اوامر عاجله ويرمش ايدى .

كامل پاشانك خاطراتنده احوالى بيان اولنان غوريل
پاشا كه اثنائى وقعه ده شرعى روم ايلي واليسى ايدى . آنك افكار
وحركاتى آتيده صورتى محرر و ۳۰۱ سنه سى ايلولنك بشى
تاريخيله مورخ اولان تلغرافى ايضاح ايدر :

« بلغارستان سلك عسكرى سنده مستخدم اولوب شمديلرده
مأذوناً بوحوالیده بولنان پاچه نامنده بر شخصك بورالرده كى

اطوار و حرکتیجه استقام اولنان سوء مریاتندن دولای
صوفیه به سرعت جلی کیفیتی کچنده بلغارستان خارجیه مدیر لکنه
یازا.ینی حالده الآن جواب آنامستدر . شخص مرقوم دیگر
شیفره لی تلغرافنامه چا کرانه مده بیان اولنان اولتلق کوی حادثاتی کبی
افساداته تصدی ایتمک و کچن جلوس هایون شلککنده اهالی
اسلامیه نك آصداقلری بایراقلره حقارت ایدن اشخاصه
برلشمنک اوزره چویانه کیدرک برطاقم حرکات و تفوهات مضربه
جرات ایله یکی کورلمسی اوزرینه محکمه موجود بولنان وزغره
عقیق متصرفلندن در عقب سوق اولنان قوه کافیه ایله هر کس
طاغیدیلوب و شخص مرقوم دخی کیزلنوب افسادات
مضرمه نك اوکی کیلمک اوزره بولندینی مرکز ولایتجه
خبر آلمسنی وقوری کویچه ده بو کبی فساد آمیز نمایشاتک
مستد وقوع اولدیمی استخبار اولنمنی ستعاقب آسایش وامینیت
محلیه نك استکمالی ضمتده هرایی طرفه مقدار کافی ژاندارمه
عسکری نفراتی سوق ایلمش و مختفی مرقوم دخی بر طرفدن
شدله تحری ایستیرلمکده اوله رق انه کچورلیدیکی آنده دفیله
نتیجه حالک عرض واشعارای مقرر بولنش اولدینی معلومات
اولق اوزره عرض اولنور اولیابده »

غوریل

وقعیه کسب اطلاع اولنمنی عقینده (فرداسی سرایده

مجلس وكلا عقدندن اولور) صدرتدن طرف عسكرى يه
ويريلان امرلك صورتى بروجہ آتيدر :

« فلبه دن ادرنه يه كلن شمندوفر تره نك شرق روم ايلیده توقيف
وتلغراف خطنك تعطيل اولمئسندن و بعض رواياتدن طولاي وصايای
حاوی ايجاب ایدن ولايتلره كوندريلان تلغرافنامه ثناورينك بر صورتى
لفاً صوب سامى سرعسكريلرينه ارسال قلمغله ولايات مذكوره ده
بولنان قوماندانلره دخی اوامر و تعليمات لازمه ارسال بيورلمسى بابنده »
۹ ذى الحجه سنه ۳۰۲ ۷ ايلول سنه ۳۰۱

ادرنه ولايته كوندريلان تلغرافك صورتى ده شودر :

« ادرنه تلغراف مأمورينك تلغراف نظارتنه يازدينى تلغراف
بالايه نقل اولمغله معلومات دولتيرينك ولدی الايجاب روم ايلي شرقيه
همان مأمور ارساليله حقيقى اوكرنيله رك نتيجه سنك سرعت كامله ايله
اشعار بيورلمسى متماندر. اشبو تلغراف آلاتر قه ساعت طقوزى اون
كچه رك تلغرافخانه يه ويرامشدر .

فى ۶ ايلول ۳۰۱

سلانيك مناستر قوصوه ولايتلرينه ده صورتى آتیده مسطور
تلغرافلر كوندرلمشدر :

« فلبه دن ادرنه يه كلن تيمور يولى تره نى دون صباح شرقى روم
ايلي ميليسلى طرفندن توقيف وتلغراف خطى قطع اولمشدر . مخبرانك
انقطاعى معلومات تامه اخذينه مانع ايسه ده شو حاللر اوراجه قاريشق
وقوعنه دلالت ايدييور . بلغارستاندن اطرافه وروم ايلي شرقيه بر
طاقم اشخاص مضره ارساليله ايقاع فساد چاليدليغنه دائر ده بعض
خبرلر آلتيور . سلانيك ولايته نتيجه غايت مدبرانه واحتياط كارانه حر كته

تحریر کاتک اور الزمہ تاثرینہ ممانعت اولنسی فرائض امور دن و تحقیقات
و محسوسات واقعہ ک پیدر پی و وقتیلہ داخلہ نظارتہ بیلدیرلسی
لازمہ دندر .

فی ۷ ایلول ۳۰۱

کامل پاشا حضر تلی خاطر اتک ینہ صحیفہ اولاسندہ
شو عبارہ لری یازیور : « وقعه دن متأثر اولان خاقان سابق
بایرام نازینہ چیقدیغده صدر اعظمه (عاجزه) حدت و بعد
صلوة العید مجلس و کلا عقدیله مذا کره مصلحت اولنسی اراده
ایتملیله بر موجب اراده سنیہ مابین هایونده بالاجتماع اولان
مذا کرده وقعه دن طبعاً متأثر اولان رفقا عریض و عمیق
مذا کرده دن صکره همان عسکر سوقیلہ منع اتحادہ مسارعت
اولنسی رأینده بولنمشلر ایدی »

کامل پاشا ایله اسمی آتیده - مشارالیه ک خاطر اتک عبارہ
عینیہ سی صرہ سندہ - درج اولنه جق بر ذات مستثنی اولمق اوزره
واقعا سائر و کلا کاملاً عسکر سوقنده اتحاد ایتمشلردی . فقط
خاطر اتک عبارات سائرہ سی جهت جهت مغایر حقیقتدر .
اولا خاقان سابق صلوة عیده چیقار کن بکا اظهار حدت ایتمدی .
بالعکس جامع دن سرایه عودت و مجلس و کلا ده مذا کره مصلحت
اولنجه یه قدر سوق عسکر فکرندن فراغتم و تعبیر آخرله
کندی فکرینہ تبعیم ایچون بکا یک نوازش کارانه معاملہ لر
ایتمش ایدی . آثار انفعالات سوق عسکره قرار ویردیردیکمدن

و بوترارند استردادى حقتده وقوع بولان ابراماته مقابل دولتك
برحملكه مهمه سنى فدايه آلت اوله ميه جغم جوابيله مقابله
ايتديكمندن صوكره باشلادى . برلين عهد نامه سيله حائر
اولديغمز حق صريح عهدى ايجانبجه وقعه نك حدوشندن
بالا خره سرايده محبوسيم وقوعنه قدر تدبير عسكرى بحثده
مصر اولديغنى يرلى واجنبى برچوق ذوات بيليرلر . اجانبندن
فضائل سائرده سى كجى فضيلت صدق قولى جمله جه مسلم اولان
قون درغولتس پاشايى اشهاد ايدرم كه مشاراليه بورايده
بولنديغنى بزه دائر يازدينى خاطراتك برنده صريحاً بيان دى
ايتمشدر .

ثانياً كامل پاشا حضرتلرينك شيوه بياناتندن يعنى
« بعد الصلوة العيد مجلس وكلا عقديله مذاكره مصلحت اولمىنى
اراده ايتميريله (خاقان سابق) بر موجب اراده سنيه مابين
همايونده بالاجتماع » عبارده سندن اراده نك قريحه دن صدور
ايتديكى اكلاشيليور . ماقوع ايسه اويله دكلدى . خاقان سابق
بايرام كوفى مجلس وكلانك اجتماعنه مخالف وبو مخالفتده مصر
اولمشدى . بنده سوق عسكرده تاخر وقوع بولمه مق مقصديله
حادث اولان مسئله ملكيه نك تدابيرى مراسم عيدين مقدم
اولدينى بيانيه بين الوكلا تعجيل مذاكرات لزومنده اصرار
ايتشم ، بوالحاك نتیجه سى اوله رق صلاة عيدين صوكره
سرايده مجلس وكلا منعقد اولمش ومذاكرات يارى كيجه يه

قدر دوام ایش ایدی . کامل پاتانک خاطر اتنده بو مبحثه متعلق اولان حکایاتک مابعدی که آلتنجی تحفه ده مطبوردور . نظر دفته شایان اولمقله حقیقت حالی بیاندن اول او حکایات زیرده ببارتها درج اولندی .

« بوباده رأی عاجزی یه مراجعت اولندقدده ادرنده نه قدر عسکر بولندینی سرعسکر غازی عثمان پاشان لدی السؤل ادرنهك موجودی یدی بیک نفر راده سنده ایسه ده بونلر سوق اولتمقله برابر برطرفدن لزومی قدر عسکر یتشدیریه . بیه جکنی سرعسکر پاشا افاده ایتسیله ادرنهك موجودی شو واستانبولده ایسه صوگردلری اولدینی کبی چوق عسکر بولنیوب عساکر موجوده مواقع عسکریه یه منقسم اوله رقی آسایش تحلی یی تأمین ایدجک مقدار دن عبارت اولدیی وولایات دن عسکر جلب وسوقی وقته محتاج اوله جفی ملاحظه سنه وبلغارلرک اولوجهله قیامی روسیهك رضا واتفاقیه میدر دگیدر معلوم اولدیغنه بناءً اویله یدی بیک عسکرله هر درلو احتمالله قارشو تهیا آتده بولنان بلغارلر ایله نتیجه سی مجهول بر محاربه یه کیریشمک موافق حکمت اولیوب باخصوص بلغارلرک حرکات واقعه لرله برلین معاهده سنک احکامنی اخلال ایتش اولدقلرندن تهیات عسکریه یه مبادرت اولتمقله برابر دول معظمه ایله بانخباره وسائط سیاسیه ایله استاتوقونک اعاده سنه تشبث اولنمی موافق مصلحت اوله جفی رأینده بولنش ایدم . وکلا

بورایه معارض وکنندو رایلرنده مصر اولدقلری مثالو رئیس
وکلای سعیدپاشا دخی اویله یدی بیک عسکرله محاربه یه کیریشلمسی
معقول اولمدیغنی مدرک ایسه ده اولجه مظهر اولدینگی معاتبه
شاهانه دن مدهوش بر حالده بولندینگی جهتله اکثریته التحاقه
مجبور اوله رق یالکیز مالیه ناظری ذهنی پاشا رای عاجزانه مه
اشترک ایش ایدی . مذاکرات اوزرینه قلمه آله حق
مضبطه تبییض اولمزدن اول مسوده سنک حضور عالی یه عرض
وارائه سی جمله ارادات سینه دن ایدوکندن اولوجهله طرف
ریاستدن یازدیریلان مضبضه مسوده سی قرائت اولتمقسنین
حضور عالی یه عرض قلمسی اوزرینه مسوده معروضه نزد
شاهانه ده ابقا اولمقله مجلسه ختام ویره رک عودته مأذون
اولدینمیز تبلیغ ایدلمش و او حالده هیئت طاعیلیمش ایدی .
عید اضحانک بشنجی پنچشنبه کونی آقشامه یقین سرای هایونه
دعوت اولنش ایدم . »

اول باول شوافادات مفصله ایچنده اولان « وسائط سیاسیه ایله
استاتوقونک اعاده سنه تشبث اولنمسی موافق مصلحت اوله جنی رایینده
ایدم » جمله سی اصول مناظره ایجابجه سند اتخاذ اولنمغه شایاندر .
چونکه مسئله نیک بالآ خره کسب ایتدیکی نتیجه که شرقی روم ایلنک
جسم ممالک عثمانیه دن منفک اولمسیدر . بونک مقدمه سنی تشکیل
ایدن ماده او وسائط سیاسیه ایله استاتوقونک اعاده اولنمسی راییدر .
بوکی احوالده وسائط سیاسیه ، وسائط عسکریه ایله مترافق

اولمذجه نتایج اکثرأ و اغلباً مطلبك خلافتك ظهور ایدر .
 نته کیم بوایش دخی او یله اولمشدر . شمدی افادات سائر مدی
 تحلیل ایدم . کامل پاشانك غازی عثمان پاشادن نقلاً ایراد
 ایتدیکی معلوماته نظراً ادر نه ده موجود عسکر او وقت یدی بیک
 نفر راده سنده ایش . طرز بیانہ نظراً کامل پاشا حضر تلو نجہ
 حقوق عہدیہ دولتک استعمالی مناسب کور و نامسی ده قوت می
 درجہ کفایہ ده عد ایتہ ملرندن نشئت ایش ایش . فقط ینہ
 کامل پاشا دیورکھ : « بونلر (یدی بیک کشی) سوق اولمغہ
 برابر بر طرفدن لزومی قدر عسکر یتشدیر یا بیاجکنی سر عسکر
 پاشا افادہ ایش ایدی . »

مجلس وکلانك بوایشده اُنک زیادہ رأی ویرمکہ صلاحیتلری
 اولان اعضای عسکریہ سی واقعا اسباب مدافعہ ده قضا اظہار
 عجز ایتہ مشلردی . حتی غازی عثمان پاشا ادر نه نك عسا کر
 ردیفہ سنی یکر می درت ساعت ایچندہ جمع و سوق ایدرم دیش
 ایدی . علی صائب پاشا ایسہ روم ایلینك مواقع سائر مدی شویہ
 طور سون یالکز آرن او دلقدہ کی قوہ عسکریہ یی قرق بیک کیشی
 تخمین ایدرک سر عسکر عثمان پاشایہ اول باول او قوتدن لازم
 اولان قسمك افراز و سوق لزومی سوتیش ایدی . کامل پاشا
 حضر تلری خاطرہ متینہ لرینہ مراجعت ایدر لر سہ بونلری
 در خاطر ایدر لر ظنندہ یم . مع مافیہ فلبہ حادثہ سنك ظهورندن
 برقچ کون اول [۳ ذی الحجہ ۳۰۲ و ۱۱ ایلول ۳۰۱ تاریخندہ]

مجلس وکلادن تنظیم اولنان مضبوطه ده (عهد قریبده طابورلرک موجودی برطاقم محملرده آلتیشر یدیشر یوزه ابلاغ اولنوب ایوم سلاح آلتده بولنان عسکر ایکی یوز بیکه وارمیشدر) فقره سی دائره عسکریه نك تبلیغاتنه مستند اولمق اوزره مسطور ایدی . آنفاً بیان اولنان تاریخ کامل پاشانك صدارتندن برقاج کون اول ایسه ده کندیلری او وقت اوقاف نظارتنده و بناء علیه وکلا عدادنده بولندقلرندن او مضبوطه دخی خاطر کذارلری اولسه کر کدر . شو حقایق و وثائقه علاوه دیکر بر ماده نك ده اختطاری ضروری کورلدی . اصحاب درایت و دقتدن اولدینی ایچون برخیلی زمان جماعت اسلامیه ناظری عنوانیه فلبه ده بولندیرمش اولدیغم جمال الدین افندی که اخیراً مصر قاضیسی ایکن ارتحال ایتمشدر . وقعه دن برقاج کون صوکره استانبوله کلدی وحادثه نك صورت جریاتی بیانا مقام مشیخته بر تقریر مفصل ویردی . آنده پرنس دوباتمیرغک فلبه یه کلدیکی کون یاننده عسکر اوله رق یاورلرندن باشقه کیمسه اولمیدینی تکرار ایدی . او ائنده مقام مشیخته ده بولنان عریانی زاده اسعد افندی مرحوم ظن ایدر سه م او تقریری کامل پاشا حضر تلرینه کوندرمش ایدی . جمال افندی مرحومک بیاناتی شو دخی تأیید ایدر که پرنس دوباتمیرغ فلبه یه کلدیکنده کامل پاشانك دیدیکی کی بر فرقه عسکریه دکل یاننده بر قطعه صغیره عسکریه بیله بولندیقندن قوه لسانیه و قلمیه ایله مقصدینی وجوده کتیرمه

چالیشمش ایدی . شوو جهله که بر طرفدن اهالی به پادشاه شرق
روم ایلینک اداره سنی بکا تفویض ایتدیکندن فله به کدم دیمش
دیگر طرفدنینه بوضورتی وایالتینک اجتماعنده کی فوائده مستبانه
مین اولمق اوزره فله نك اسواق وازقه سنه مطبوع بیاننامه لر تعلیق
ایتدیرمش ایدی . الحاصل دفع صائله کافی عسکر مرز و ار ایدی .
ومتجاوز اولان پرنس مبدأ حادثه قوتدن متجرد ایدی . کامل
پاشا خاطر اتنده او وقت استانبولده چوق عسکر بولندیغنه دایر بر
فقره دخی وارسه ده بونک محاکمه سنه کیریشمکدن ایه اوزمانکی
قوای عسکرینه نك صورت تقسیمی ارکان حربیه دائره سنده
مقید و حل اشتباه ایچون او قیوده مراجعتی توصیه ایتک
کافی اوله جغدن بو یحیی توسیعه لزوم کورمدم . فقط خاطر اتنده
بلغارلرک اول وجهله قیامی روسیه نك رضا و اتفاقیه میدر
دکیمدر معلوم دکلمدی مألنده بر ملاحظه مهمه کورلدیکندن
بوراسی جای بمحدر . رجال سیاسیه بر دولته عائد اولان حادثه
سیاسیه ده دیگر دولتلرک نظریات وحرکاتی اومسئله نك وجوده
کلدیکی زمانده موجود اولان افکار و احوال دولیه دلاتیه
استکشاف ایتکده اولمارینه نظراً او وقت بلغارلرک قیامی
روسیه نك رضاسنه ویا اتفاقه مستند اوله بیلیرمی ایدی اوله مزمی
ایدی بوقضیه کامل پاشا حضر تلری نزدنده منکشف اولدیغنده
شبه یوقسه ده مسئله یی بیلیمیانلرجه مدار وقوف اولمق ایچون
آئیده کی وثیقه نك ارائه سنی مناسب عد ایتدم :

مجلس وکلادن تنظیم اولنان مضبوطه ده (عهد قریبده طابورلرک
موجودی بر طاقم محملرده آلتیشر یدیشر یوزه ابلاغ اولتوب
الیوم سلاح آلتنده بولنان عسکر ایکی یوز بیکه وارمشدر)
فقره سی دائره عسکرینه نک تبلیغاتنه مستند اولق اوزره مسطور
ایدی . آتفا بیان اولنان تاریخ کامل پاشانک صدارتندن بر قاج
کون اول ایسه ده کندیلری او وقت اوقاف نظارتنده و بناء علیه
وکلادنده بولندقلرندن او مضبوطه دخی خاطر کذارلری
اولسه کرکدر . شوحقایق و وثائقه علاوه دیگر بر ماده نک ده
اختطاری ضروری کورلدی . اصحاب درایت و دقتدن اولدینی
ایچون برخیلی زمان جماعت اسلامیه ناظری عنوانیه قلبه ده
بولندیرمش اولدیغم جمال الدین افندی که اخیراً مصر قاضیسی
ایکن ارتحال ایتمشدر . وقعه دن بر قاج کون صوکره استانبوله
کلدی وحادثه نک صورت جریاتی بیانا مقام مشیخته بر تقریر
مفصل ویردی . آنده پرنس دوباتمیرغک قلبیه کلدیکی کون
یاننده عسکر اوله رق یاورلرندن باشقه کیسه اولمدینی شمرایدی .
او ائناده مقام مشیخته بولنان عریانی زاده اسعد افندی
مرحوم ظن ایدر سه م او تقریری کامل پاشا حضر تلرینه کوندرمش
ایدی . جمال افندی مرحومک بیاناتی شو دخی تأیید ایدر که
پرنس دوباتمیرغ قلبیه کلدیکنده کامل پاشانک دیدیکی کبی
بر فرقه عسکریه دکل یاننده بر قطعه صغیره عسکریه بیله
بولندیغندن قوه لسانیه و قلمیه ایله مقصدینی وجوده کتیرمه

چالیشمش ایدی . شوو جهله که بر طرفدن اهالی یه پادشاه شرق
روم ایلینک اداره سنی بکا تفویض ایتدیکندن فله یه کلدم دیمش
دیگر طرفدنینه بوصورتی وایالتینک اجتماعنده کی فوآنده سستیله یی
مین اولمق اوزره فله یه نک اسواق وازقه سنه مطبوع بیاننامه لر تعلیق
ایتدیرمش ایدی . الحاصل دفعه صائله کافی عسکر مرز واری ایدی .
ومتجاوز اولان پرنس مبدأ حادثه ده قوتدن متجرد ایدی . کامل
پاشا خاطر اتنده او وقت استانبولده چوق عسکر بولمغیغه دائر بر
فقره دخی وارسه ده بونک محاکمه سنه کیریشمکدن ایسه اوزمانکی
قوای عسکر یه نک صورت تقسیمی ارکان حربیه دائره سنده
مقید و حل اشتباه ایچون او قیوده مراجعتی توصیه ایتک
کافی اوله جغندن بو بختی توسیعه لزوم کورمدم . فقط خاطر اتنده
بلغارلرک اول وجهله قیامی روسیه نک رضا و اتفاقیه میدر
دکیدر معلوم دکلدی مآئنده بر ملاحظه مهمه کورلدیکندن
بوراسی جای بمحدر . رجال سیاسیه بر دولته عائد اولان حادثه
سیاسیه ده دیگر دولتلرک نظریات وحرکاتی اومسئله نک وجوده
کلدیکی زمانده موجود اولان افکار و احوال دولیه دلاتیه
استکشاف ایتکده اولملرینه نظراً او وقت بلغارلرک قیامی
روسیه نک رضاسنه ویا اتفاقه مستند اوله بیلیرمی ایدی اوله مزمی
ایدی بوقضیه کامل پاشا حضرتلری نزدنده منکشف اولدیننده
شبه یوقسه ده مسئله یی بیلیمانلرجه مدار وقوف اولمق ایچون
آئیده کی وثیقه نک ارأئه سنی مناسب عد ایتدم :

فلبه وقعه سنگ حدوئندن اوچ کون صکره اووقت روسیه
خارجیه نظارتنده بولئان موسیو کیرز طرفندن روسیه نك
استانبول سفارتنه کلوب سفارت مستشاری موسیو اونو
واسطه سیله بکا قرائت اولمش اولان تلغراف صورتیدر :

« ایمپراطور حضرتلری بلغارستانده ظهوره کلان حرکاتی تفسیح
ایدر . اشبو حرکاتی ترویج ایده میه جکز . ایمپراطور حضرتلری
حرکات مذکورده اشتراک ایلاملری روسیه ضابطلرینه امر ایتشلردر . »
اخطار — بالاده کی تلغرافنامه نك صورتی اعطا ایدوب
ایتمیه جکنی سفارت مستشارندن صورمشدم . صورت برائمه
مأذون اولمדיنی آ کلاشملغله مفهومی ترجمه اوله رق ضبط
ایتمش وبونی خارجیه ناظرینه کوندره جکمی بیان وکندیسئلده
اووقت خارجیه نظارتنده بولان عاصم پاشایی کورمسنی رجا
ایلمشدم .

کامل پاشانك خاطراتنده « اویله یدی بیک عسکرله
هر دورلو احتماله قارشى تهيآئده بولان بلغارلر ايله نتیجه سی
مشکول بر محاربه یه کیریشمك موافق حکمت اولمديغنه دائر
مندرج اولان ملاحظه یه ده کلنجه ، مباحوث عنه اولان یدی
بیک کشی مشارالیهك غازی عثمان پشایه اسناداً ادرنه ده وجودینی
بیان ایتدیکی عسکر اولیور . قوای عسکریه نك کمیات صحیحه سی
افادات ذاتیه وشفاهیه یه دکل ارکان حربیه قیودی ايله تعین
ایدرسه ده شو افاده صحیح بيله اولسه ادرنه ایکنجی اردو

مرکزیدر . بر اردونك قوتی مرکزده کی قطعهٔ عسکریه دن عبارت ظن ایتک ایسه طوغری دکلدر . قالدی که کامل پاشا وکلای سائرده نک کندی راینه یعنی سوق عسکر اولنماسنه معارض وکندی رایلرنده یعنی عسکر سوقده مصر اولدقلرینی یازدقدن صکره بنم ایچوندده بعض شیر ایراد ایتشددر . فقرات تالییه یوقاریده عیناً مسطور ایسه ده اهمیتی ویا غرباتی جهتیله آتیده تکرار اولنور :

« رئیس وکلا سعید پاشا دخی اوילה یدی بیك عسکرله محاربه یه گیریشلمسی معقول اولندیقی مدرک ایدیسه ده اولجه مظهر اولدینی معاتبه شاهانه دن مدهوش بر حالده بولندیخی جهتیله اکثریته التحاقه مجبور اوله رق یالکز مالیه ناظری ذهنی پاشا رأی عاجزانه مه (کامل پاشانک راینه) اشتراک ایش ایدی . » بخش اولنان حصهٔ ادراکه تشکر ایدرسه ده مغایر حقیقت بولنان افاداتی تصحیحه مجبورم . یوقاریده دخی ایراد ایتشدم که حدوث وقعهٔ اثناسنده خاقان سابقک معاتبه سنی دکل لعلهٔ مجامله کارانه معامله سنی کورمشدم . مع مافیه فرض ایده لم که عتاب واقع اولمشدر . کامل پاشانک تعیرنجه بوندن مدهوش اولسه یدم معاتبک یعنی عتاب ایدن ذاتک امری که سوق عسکردن فراغت ایتک و بونی قاله آلاماق ایدی اوامرء تابع اولوردم بن ایسه مداخلهٔ عسکریه دن صرف نظر اولنسی فکرینه شدیداً مخالفت ایتدم . دیمک که معاتبه یه اهمیت ویرماشم یاخود وجدانک

عتابی ، خاقان سابقك عتابی فوقنده طوتمشم . بو حالده مدھوش
تعییری خلاف ماقوع و نایم حلدرد .

خاطر اتده « قلمه آله حق مضبطه تیبيض اولمزدن اول
مسوده سنك حضور عالییه عرض و ارأه سی جمله ارادات سنیه دن
ایدو كندن اولو جهله طرف ریاستدن یازدیری لان مضبطه مسوده سی
هیئته قرائت اولمقسزین حضور عالییه عرض قلمه سی اوزرینه
مسوده معروضه نزد شاهانه ده ابقا اولمغله مجلسه ختام ویردرك
عودته مأذون اولدیغمز تبلیغ ایدلمش و او حالده هیئت طاعلمش
ایدی « عباره لری قسماً محتاج تصحیح ددر . مضبطه مسوده سنك
مجلسده قرائت اولمقسزین عرض اولندیغنی طوغری دكلدر .
بالعكس كافه اعضا حاضر اولدقلى حالده مجلسده اوقومش
ایدی . بعده خاقان سابق مسوده یی ایستدیكندن ینه مجلسك
معلومات و رأیله كندیسنه كوندرلمشدی . سوق عسکر قرارینه
اعتراض ایدهرك مسوده یی اعاده ایتدی و اول امرده حرکات
واقعیه سی اسبابك پرنس دو باتمیرغدن استیضاح اولتمسی ایچون
ایکی کره باش كاتی وایکی کرده صكره لری تشریف هایون
مدیری عنواتی آلان محمودا قندی یی مجلس وکلایه كوندردی .
تلقى ایدیلان ارادات اوزرینه تکراراً مذاکرات جریانندن
صكره استیضاحك موافق حال اولدیغنه قرار ویرلمش و سوق
عسکر لزومی تأید ایتمش ایدی . حتی مسوده اصلیه یی مرحوم
حسن فهمی پاشا تنظیم ایتمش و مذاکره ثانیه ك اسباب موجبیه سی كه

پك مفصلدر مجلس حضورنده بزم طرفدن ديكته صورتياه
يازديرلمش ايدى. بونك ده ميضى خاقان سابقه گوندرلدى ايسه ده
نزندنه آليقويوب اراده سنى ويرمامش و بالعكس او كيجه لك
مجلسك طاغلمسنة امر ويرمش ايدى. بايرامك ايكنجى كوني
وقوع بولان ايكنجى اجتماعده هيئت وكلا بر طاقم مباحث
سياسيه ايله اشغال اولنمشسده دفعه ثانيه اوله رق قلمه آلتوب
خافان سابقه قبول ايتديريلان مضبوطده « بو مثالو حادثاتده
اتخاذ اولنه جق تدابير اوچ صورتدن عبارتدر برى حصر آتدابر
ديپلوماتيقيه، ديكرى ينه حصر آ قوه عسكريه يه مراجعت اولنمى
واوچنجيسى هرايكيسنك برلكده اجرا سيدر. موضوع بحث
اولان بلغارستان اتحادى تشبثاتنك كسر و ابطالنده مقصد
دوات عليه يي تايمينه منحصر آ تدابير ديپلوماتيقيه كافى اوله مز
و شرق روه ايلينك آساشى تهديد اولندوقده دولت عليه طرفدن
اورايه عسكر ادخاليله بعده يالكز استان بولده اولان سفرايه اخبار
كيفيت اولونمى برلين عهدنامه سى احكامندندر » فقره لرى
موجوددر. هيئت وكلا جه تبدل وقوعنده شو فقره لرك تعين ايتديكى
خط حركت كه اساساً حركت عسكريه ايدى تبدل ايمه مك لازم كليز
ايدى. لكن هيئتك تبدل ايله مسلك موضوع تحول ايلدى و بايرامك
بشنجى كوني سرايه جلبمله مجبوس يتم وقوع بولدى. تفصيل
ماجرى نشر اولتان خاطر اتمده موجوددر. او هنكامه ده كامل
پاشانك مابينده بولنديغى خاطر اتنك يدنجى صحيفه سندن آ كلا.

شیورکه شمدی یه قدر بوکا مطلع اولماشدم. مشارالیه اوصحیفه نك خاتمه سنده دیورکه: « اوکیجه سرای هایونده بیتوت اولنه رق فرداسی کونی برقاعده باب عالیده مراسم معتاده اجرا اولنش ایدی. » شرقی روم ایلی مسئله سنك زمانه عائد صفحاتی هر نه اینسه اساساً وبلا نقصان بالاده یازدم. توضیح حقیقت ایچون تکمله اساسیه سنی یعنی خلفم زمانه متعلق اولان اشکال نك فروع مفصله سندن صرف نظرله اصلیه ده شو صروده درپیش ایتك ضروریات مباحثه دندر. مسئله نك کامل پاشا زمانده ظاهر اولان شکل نك اصلی شرقی روم ایلی یه وقوع بولان تجاوزی دفع ایچون دولتک عهداً حائز اولدینی حقوقی استعمال ایتمه سیدر. وسیله معذرت اولمق اوزره اورته یه قونیلان شی که ادرنده بولنان عسکرک یدی بیك کشیدن عبارت بولنم سیدر. بونك صحتی تصدیق اولنسه وعموماً روم ایلی قطعه سنده بولنان قوه عسکریه نك ادرنده کی اویدی بیك کشیدن عبارت اولدینی فرض وتقدير ایدلسه دخی بومانعلرك حکمی برقاج کون ایچون جاری اولدیلردی. زیرا عثمان پاشایه خلف اولان علی صائب پاشا سرعسکرلکه مأموریتی ایله برابر روم ایلده ذاتاً متحشد اولان قوه مهمه یه علاوه قوای جدیده کلیه جمع ایتمش ایدی او حالده بونلرله روم ایلی شرقی اشغال اولمق لازم کلیردی. حال بوکه معذرت موقتّه مفروضه نك سرعته زائل اولدینی ده نظر اعتباره آلمسه که آنی یایمق رجال حکومته کوره اختیاری قابل اولیان بر حاکم

بونی ده دیگر بر حال تعقیب ایدیور که اعتذارده دوامه اصلا
 امکان وجواز ویرمز اوده پرنس دوباته رغاب صربایلرله محارب
 بولندقلری زمانده المزه چکن فرصتدر . کامل پاشاده خاطر اتنده
 شووقت مساعدی اعتراف ایدیور . سکزنجی صحیفه سینده شو
 عبارملر واردر : « بلغارلر صرب حدودنده محاربهده بولندقلری
 ائنده همان اردو سوقیه روم ایلی شرقینک ضبطی رایینده بولنش
 ایسهده بوکاده سلطان حمید اراده ویرماش اولسیه فرصت
 فوت اولمشدر » بوکا ضمیمه اولوق اوزره دیگر بر ماده دها
 وارکه کامل پاشا حضرتلرینک خاطر اتنده مسکوت عنها بر اقلمغه
 تمیماً للمباحث بیان اولتور : بلغار حکومتی صرب حکومتیه
 اعلان حرب ایتدیکنده شرقی روم ایلی بی تخلیه ایلدیکنی و دونتک
 سوق عسکرله ملکنه صحابت ایتسنی تلغرافله کامل پاشا
 حضرتلرینه بیلدر مشدی . ایدی بلغار و صرب محاربه سی
 ائاننده هیئت وکلا شرقی روم ایلنک خاطر اتنده دنیلدیکی کبی
 همان اردو سوقیه ضبطی رأی ایتشده مقام سلطنتدن بوکا
 ممانعت اولمش ایسه رئیس وکلانک استعفا ایتسی لازم کیردی .
 اعتقاده کوره کامل پاشا حضرتلری بونی یاמש اولسهیدی
 خاقان سابق ایکنجی بر حمایه تصدی ایتز یعنی کامل پاشانک
 ریاستده اولان هیئت جدید وکلایده تبدیل ایله مزدی او
 حالد سوق عسکر قراری موقع اجرایه قونیلور ایدی الیوم
 ذکریده ، کورولسیده بر کونا الم اولان مخاطره ملکیه که

پایتخت قیوسی اولان بر ولایت مهمه نك ضیاعیدر وجوده
كلش اولمزدی . « ذ كرى ده كورلمسى ده بر كونا الم » ديه
تعريف حال ايديشم بو دفعه عزيمت وعودتده شرقى روم ايلدين
كچركن حاصل ايتديكم حسيات سوقيله در . زيرا وضعيت
جغرافيه سى مهم اولغله برابر زراعت و اقتصاد جهتلرندن وسائر
نقاط نظردنده بر چوق اهميتى حائز اولان وشمندوفرله طولى
اون ساعتده قطع اولنان بر ولایت واسعه نك اسباب مبرمه ييه
مستند اولمق سزین اضاعه ايدلمسى تأثر ائمى تجديد ايتمشدر .

كامل پاشا خاطراتنك يوز يتمش اوچنچى صحيفه سى شرقى
روم ايلي حقينده كى معامله سمنك اصابتده اصول مشروطيتنك
اعلانندن صوكره كى معاملاتده استشهد ايدىيور و دنيليوركه :
« صدارتدن انفصالمه (صدارت اخيره دن انفصال لرينه) دكين
بلغارستانك استقلالى هنوز حكومتجه طانماش ومحاربه
وقوعنك منعى ضمنتده معاوضه تقديه اوله رق روسيه نك بلغارستان
ايچون ايفاسنى درعه ده ايلديكى يوز يكرمى بش ميليون فرانقندن
بر پاره آلمانماش ايدوكندن اكر جبراً محافظه حقوق دولته
امكان كورلمش اولسه اولبايده باب عاليجه روسيه ايله
قرار اشديريلان صورت تسويه مجلس مبعوثانجه تصديق اولمز
ومسئله هيت سابقه سنه رجعت ايش اولمى حسييله خلف
عاجزى حامين حامى پاشا حضرتلرى مالك اولدينى قوه ماديه

وتدابیر سیاسیه ایله روم ایلل شرقی ایالتی حال ابتدائیسینه
ارجاع ایلر ایدی . »

بو مدافعاته جواب ویرمک حسین حلمی پاشا حضر تارینه
عائددر . فقط کامل پاشا حضر تارینک صدارت اخیره سنده
استقلالی تصدیق ایدن معاهده امضا اولنما مشهده اوستریا
بوسنه وهرسکک ممالکنه الحاقی وبلغارستان استقلالنک تصدیق
طلب ایتدکری ائنده دول حتمه بر قونفرانس عقدنی تکلیف
ایلدیلر . اوایه بر مجلس دولییه حواله مصاحبت اولنسه یدی
دولت علیه خصوصاً بلغارستان استقلالنک تصدیق ایچون
شرقی روم ایلینک حال اصلیسینه رجعتی بحق شرط
اتخاذ ایدردی . وبو ایالت بلغارستانک جزؤ منضمی عد
اولنمی حقنده تصدیق دولی بولمادیغندن مبحوث عنه اولان
الحاق واستقلال تکلیفلرینی نظریات سیاسیه لرینه موافق کورمیان
بعض دولتلرله بینمزده اتحاد افکار حصولی اقوای مختملات
ایدی . حتی اوستریا بوسنه وهرسکک کندی ممالکنه الحاقی
طلب ایتدیکی حالده بلغارستانک استقلالنه بلکه علناً ویامعناً
مخالفت ایدردی . فقط باب عالی قونفرانسه دخولده اولان تردد
کوستردی ودرجه ثانیهده قایتولاسیونلرک لغوی واجنبی
پوسته لرینک رفی ماده لرندن بدآ ایله ده برچوق مواد حقنده
مطالبزک دولتلر طرفندن قبولی والا بویکی مسئله علاقه داران
بیننده یعنی بر طرفندن حکومت عثمانیه و دیگر طرفندن اوستریا

و بلغار حکومتی آراسنده بالندا کره فصل ایدیه جگنی مقام
 تهدیده تبلیغ ایددی . دول مشار الیم بو تکلیفمزه مطلع
 اولدقلرنده موضوع بحث اولان الحاق واستقلال مسئله لریله
 باب عالینک بیان ایتدیکی مسائل قدیمه بیننده قطعاً مناسبت
 و ارتباط کورمدیلر باب عالینک طوغریدن طوغرییه مذا کره
 و معاقده ایچون اظهار ایتدیکی تمایل ایسه بعض دولتلرک نظریات
 و فوایدینه ده موافق کلدیکندن آنلرکده تشبثایله دولتلرک
 کافه سی بوماده لری برلین معاهده سنک مضیسی اولان دولتلرک
 انضمام آراسیله دکل منفرداً مذا کره و قطع ایتمک ایچون باب
 عالی پی مختار براقیدیلر ... تعویض نقدییه کلنجه ؛ یوزیکرمی
 بش میلیون فرانقدن واقعا کامل پاشا زماننده پاره آلتامششده
 معاوضه نقدیه فکری ده غالباً ابتدا برم طرفدن صدور ایتمش
 و بعدده بلغارستان نامه اوله رق روسیه بونی تعهد ایلمش ایددی .
 کرک تکلیف ابتدائی بزدن واقع اولسون و کرک دیگر طرفدن
 ظهور ایتمسون اسامی و کیتی حسین حلمی پاشا قایینه سنه
 آنک سلفی اولان قایینه طرفدن انتقال ایتمش ایتمش .
 چونکه مجلس معوثاندن مجلس اعیانه کلن پروتوقوللرک مذا کره سی
 ائناسنده قوتفرانسدن اجتنابمزلرک اسبابی حسین حلمی پاشا
 حضر تلرندن استیضاح ایتدی کمد سلفی زماننده قوتفرانس ایچون
 یوقاریده شرح ایدیلان شکلده سفرای عثمانیه یه بر تحریرات
 تاغرافیه کوندرلیدیکنی و بناءً علیه قوتفرانسه بدل طوغریدن

طوغری به مذاکره قبول اولمسی اساسری کندی ریاستده
تشکیل ایدن قاینه به ، هیئت سالفه دن منتقل اولدیغی سونیش
ایندی . و او صروده مشار الیهک اراءه ایتدیکی تلفراقامه
مسوده سی زیرنده ده کامل پاشا هیئتیی تشکیل ایدن ذواتک
امضالری کورلمش ایدی بوخصوصلر حقنده بنجه ده ا زیاده
ایراد ملاحظاته محل یوقدر . مانحن فیها اولان شرقی روم ایلی
مسئله سنه رجوع ایدیلنجه تسویه صالحیه خصوصنده مقام
سلطنتله مقام صدارتک اتحادی حال حاضر الیمی انتاج ایش
اولدیغنه شبهه یوقدر . فقط طرفین مسبیندن بری غلبه و هم ایله
بونو یامیش دیگر طرفک فعلی بعض ملاحظات سیاسییه ایله
وقوعه گلش اولدیغندن تمامیت ملکیه مزه بر ضربه اولان
و تأثیراتی بوندن صکره دفع ایتک ممتنع بولان شو حال ایچون
هانکی طرفک قصوری آغیر اولدیغی تأمل و موازنه به شایاندر .

ایشته شرقی روم ایلینک اخیراً کسب ایتدیکی موقع
سیاسییه سبب اولانلره شو نقطه دن نظر اولنور : مسبب
آرامیوبده یالکز نتیجه فعله باقیلیرسه آنک خلاصه سی ده
شودرکه : ۷۶۵ سنه هجریه سنده سلطان المجاهدین خداوندکار
غازینک فتح ایلدیکی فله ایالتی تام ۵۳۷ سنه ملک عثمانی عدادنده
قلش ایکن ۱۳۰۲ تاریخنده غریب بر خطای سیاسییه قربان
اولدی . اوزمانه قدر بومملکت واسعه نک ساحه فیاضنده سعادت

حاله یشایان وعددی ایکی یوز اون بش بیکه بالغ اولان نفوس
اسلامیه بوکونکی کون بی نام ونشاندرلر .

سوزی بوراده کسوب کامل پاشا خاطراتنک جمله محتویاتندن
اولان مصر مسئلهسنک بکا تعلق ایدن فقرات غیر صحیحه سنی
تصحیح ایتمکده ضروری کورویلیور .

کامل پاشا حضرتلری خاطراتنده (اوتجی صحیفه نك سطور
اخیره سندن بدأ ایله اون التجی صحیفه نك اون اوچنجی سطرینه
قدر) مسئله مصریه نك حکومت محلیه عائد جهاتی ایچون
برتاریخچه یامیش ایسه ده یازیلان شیرلر نواقصدن خالی کورویلیور .
مصرده و فرانسه ده ایسه وقایع اخیره مصریه تاریخلری پک
اطرافلی اوله رق تحریر و نشر اولنمشدر . آرزو ایدنلر
آنلره مراجعتله استحصال و استکمال معلومات ایلیه بیلیرلر .
فقط خاطراتنک تاریخ قسمنده هر نسله ترتیب طبیعی التزام
اولنمديغندن وقوعه کلن تقدیم و تأخیرلر اذهانی یا کاش ضیاته
اماله ایده بیلیر . از جمله اون اوچنجی صحیفه یه استانبولده عقد
اولنان قونفرانسک اسباب اجتماعنه دائر قسماً واقعه موافق
وقسماً اوکا مخالف معلومات درج اولندقدن صوکره «قونفرانس
عقدی بر شیئه یارامامشدر . « سوزیه مبحثه ختام ویریلیورکه
بو قونفرانس بندن اولکی هیئت وکلا زماننده رد اولنمش ایکن
صدارته تعیینمی متعاقباً کوردیکم فائده و کوستردیکم لزوم اوزرینه
بزم طرفدن قبول اولنه رق دولت علیه خارجیه ناظرینک تحت

ریاستده انعقاد ایتشدی . کامل پاشا خاطراتنک اون بشنجی
 صحیفه سنده ایسه « عراقی نك بوبابده کی تصمیمی سلطان عبدالحمید
 طبعنه توافق ایتمکه وقوع اختلالده خدیوه قوۃ الظہر اولہ رق
 روم ایلیدن مصره اون اون بش طابور عسکر سوقیایه منع
 عصیانہ اہتمام اولنه جق یرده عراقی نك اقداریایه منویاتنک قوہ دن
 فعلہ کتیرلمسی جہتی التزام و مستشارلری اولان مقرینک
 تسویلاتنه اتباع اولنہ رق بوفرستله مصرک امتیازاتی فسخ ایله
 والیلکنک مناسبہ بالالہ سائر ولایات شاہانہ مثللو اداره سی
 وواردات جسیسہ سنک خزینہ مالیه آلمسی موفقیات عظیمہ دن
 اولہ جنی تخمین و تصور اولنمیدرکہ اولیایہ بر منصب موہومہ
 طبعاً تشنہ وحریر اولان یاور اکرم شہریاری درویش پاشا
 فراشت وکیلی احمد اسعد افندی ایله معاً مصره اعزام وریس
 عصاة عراقی پاشانک مقام خلافت سنیه یه اطاعتی محافظہ ایتک
 مقصدیایہ کندوسنہ برنجی رتبہ دن مجیدیہ نشان ذیشانی دخی
 ارسال واحسان بویورلمش ایدی . جریان احوالہ کسب ووقوف
 ایدن انکلتزہ دولتی ذات شاہانہ مصرک ملکداری اولدینی
 حالده کندی منافی علیہندہ تشبثات غیر حکیمانہ ده بولنمسندن
 طولانی بعدما دولت علیہ نك عسکر سوقیایہ اشتراکنی اشکال
 وبروجہ مذکور یالکز باشنہ حرکتلہ حرباً مصرلورلی مغلوب
 ایتشدی . »

دینلمشدرکہ بو حاللرک وقوعی نیم اوچنجی دفعہ صدارتہ

تعیینیدن اوله یعنی عبدالرحمن پاشا حضر تفرینک ریاستده بولنان هیئت وکلانک زمانه مصادف ایدی .

زمان مأموریتده اجتماع ایدن قونفرانسک بحثی اون اوچنچی صحیفهده و خدیویتیگ الغاسی تصویرینی و درویش پاشا ایله فراشت وکیلنک مصره اعزاملرینی و عرایینک مضممراتنک فصله کتیرلمسی التزام و کنیدیسی نشانله تلطیف و تشویق ایدلدیکنی ده اون بشنچی صحیفهده او قویانلر ترتیب کلام سوقیله خلاف حقیقت برشیئه یعنی انکلترونک مداخلهسینی تشدید ایدن احوال مشروحه نک زمانده وقوعه ذاهب اوله بیلیرلر . مباحث عنه اولان تقدیم وتأخیرلر البت اثر عمد اولیوب اثر ذهول ایسه ده نایمحل فکرلر حاصل اولماق ایچون اول باول بو جهتی تصحیحه لزوم کوردم .

قونفرانسک برایشه یارامدیغی دعواسنه کلنجه ؛ بوراسی کلیاً نفس الامرده مخالفدر . قونفرانسک مذاکراتی بزه بیوک فائدهلر تهیه ایتمشدی . حیفا که بز استفاده ایتدک . بویولده تطویل کلام ایتکدن ایسه صورتی آتیده مسطور وثیقۀ مهمه ایله اثبات مدعا ایلکی دهها مناسب کوردم .

مجلس وکلا مضبوطه سی صورتیدر :

« قونفرانسک اجتماع سادسده جریان ایدن مباحثاتک تفصیلاتی حاوی مرخص پاشالرك تقرير مشترکلیله مقام وکالتک تذکرۀ معروضه سی و اجتماع مذکورۀ دائر بین المرخصین قلمه آلتان ضبطنامه

ایله انکلترة سفیری طرفندن ویریلن مقاوله عسکریه لایحه سنک میانه عاجزانه مزیده مطالبه سیله مسئله نك اهمیت فوق العاده سنه و مجلسه برخطا وقوعنده ترتب ایده جك مسئولیتك جسامتنه مبنی اکا کوره بر قرار اتخاذینی و خدیو لاحتك طرف حکومت سنیه دن حمایه سنه و عراقی پاشانك عاصی اولدیغنی اشاعیه دائر انکلترة دولتی طرفندن طلب اولنان اعلاننامه نك بوبابده ارادت سنیه استحصال اولمدهجه نشر ایده میسی مقتضای امر و فرمان هایون جناب پادشاهیدن اولدیغنی مبین ۲۷ ن سنه ۹۹ تاریخلی تذکره علیه و اوراق مذکوره مطالعه وبالاطراف تدقیق ماده اولندی .

تقریر مشترکک رأی محلی نتائج مباحثه نظراً اوچ صورت تخطر اولنوب برنجیسی انکلترة سفیرینك افاده سی اقتضاسنجه دولت علیه قومیسرلریله قوماندان پاشانك شیمیدین ارساللری حالنده برکونا مشكلاته تصادف اولمیه جنی مجزوم بولندیفدن آنلر همان کوندریله ريك مقاوله نك دخی سرعت عقدیله عقبنده عسکرک حرکته امر ویرلسی وایکنجیسی کرک قومیسرلریله قوماندان پاشانك وکرک عسا کرشاهانه نك مقاوله تنظیم اولندقدن صوکره ارساللری و اوچنجیسی مقاوله مذکور نك عقدینه تعلیق مصلحت اولنیوب قومیسرلریله قوماندان پاشانك و عسا کر شاهانه نك شیمیدین یوله چیقارلملری ماده سی اولدرق قومیسرلریله قوماندان پاشانك برآن اول مصرده وجودلری مصلحه حسن تأثیری وفائده مهمه یی داعی اوله جنی بدیهیاتدن اولغله انلرک عسکردن اول کوندرلملرنده بر محذور اولیوب بالعکس بو ماده دهها زیاده موائق مصلحت کورندیکی وانکلترة سفیرینك تعلیمات و جوابانك تسریعی مقصدیله عسا کر شاهانه نك پنجه سنه ویاخود جمعه کونی حرکت امرینی آله جنی سفیره و سفارت سنیه واسطه سیله لوندرة قاپینه سنه تحریر و تبلیغ اولمش وآنك نتیجه سی اوشق اوزره پنجه سنه کونی ایله چریه تعلیمات کلش ایسه ده مقاوله قرار لاشمزدن اول عسکر کوندرلیز ایسه قبولی ممکن اولمیه جنی سفارتك افادات متوالیه معروضه سی ایجابندن بولمسنه نظراً اوچنجی

طریقه مراجعت اولئمنی یعنی مقاوله نك عقدندن اول عسكرك ارسالی محذوردن خالی اولیه جغفی بیاندن عبارتدر .

بومستله نك ایکی جهت مهمه سی اولوب بریسی سویش قنالی ایچون قونفرانسه فرانسه دن ماعدا دولتر طرفندن قبول اولنان تدابیر حمایت کاریدر . حال حاضرده قنالی انکیزلرک اشغال ایلمش اولمیرینه نظراً بر مداخله مضره دائمیه محل بر اقامق ایچون تکلیف اولنان ضابطه مختلطه بحریه یی دولت علیه نك قبول ایتمی مقتضای احواله موافق و امر ضروریدر . قتالک برأ مدافعه و محافظه سی ماده سنك حکومت سنییه عائد اولدینی بخشنده اجتماع سابقده بزم طرفزدن ایراد اولنان ملاحظه دخی نفس الامر موافق اولدیغندن اجتماع آتیده دخی دولت علیه مرخصلری طرفندن بونك تأیید و محافظه سیله شاید مرخصین سائر طرفندن کسی تکلیف وقوع بولور یعنی ایستك ایدن دولتردن هر قنغیسنك برأ قنالی اشغال ایتمك صلاحیتنی حائر اولسی تکلیف قنور ایسه اکا موافقت اولتیوب باب عالیدن تعلیمات اخذینه تعلیق ماده اولئمنی لازم کلور .

ایکنجیسی انکاتره طرفندن طلب اولنان مقاوله عسکریه درکه بونك اساسی مصره دولت علیه جاتبدن عسکر سوق اولنوب اولنامسی بخشنه انتال ایلر . انکاتره دولتنك مصره عسکر سوق ایتمی و بر طرفدن تدارکات عسکریه سنی ایلرولئمنی و عراقی پاشا فرقه سنك فعلاً داعیه مقاومتده بولئمنی ایله زیاده دقت و احتراز ایدیله جك برشی اولوب بو حاللرک نتیجه سی اولق اوزره دولت مشارالیه مصرجه مقصد استیلا کارییه خدمت و یا حکومت محلیه ایله و یا خود قارشو سنده اولان فرقه محاربه ایله او یوشوب اداره مصریه جه مرضیسنه کوره بر صورت تسویه عقدینه کسب قدرت لیدر ایسه دولت علیه ایچون مخاطره عظیمه سی میدانده در . بو مخاطره یی قارشو لیه جق تدبیر ایسه عسا کر شاهانه نك برآن اول سوقیه حقوق حاکمیت سنییه نك کرک اهالی محلیه ایله عموم تبعه قارشو سنده و کرک انظار دولیه ده فعلاً

اثباته مربوط کورینوب انکلتزه ایسه عسکرک قبولی برمقاوله عسکریه عقدینه تعلیق ایلمکده اولسلیله و طرفین عسکری بیننده اختلافات و ضدیات وقوعنه و ایکی دولت بیننده منازعات حدوشنه محل قالمق ایچون بویه برمقاوله عسکریه عقدی لازمه دن کورنمک بونک تنظیمی لزومنده تکراراً و هیئت منضه ایله معاً اتحاد حاصل اولدی . بوبابده سفیرک ویردیکی لایحه نك دردنجی ماده سنده « انگلیز و عثمانی عسکرینك اعزاملرینه سبب اولان حال برطرف اولدقده طرفین عسکری مملکتی تخلیه ایده جکلردر » فقره مهمه سی مندرج اولوب انگلیزلك نیات حریرانه دن بری بولندقلرینه دائر واقع اولان اعلان کچنده لورد غلادستونك پارلمنتوده ایراد ایتدیکی نطقلر بدرجه یه قدر موقع شبهه یه دوشوردیکی حالده شمدی بین الدولتین برمقاوله یاپیلوبده آنده دولت مشارالیه نك اسباب اشغالک اندفاعیله برابر عسکرینی چکمکی تعهد ایده جکی مندرج بولمسی بزجه موجب استفاده برشرط کورینور فقط لایحه نك برنجی ماده سنده ایکی طرفك قوه عسکریه سی حرکات مشترکه ایله تقید ایدلش اولدیفندن شو فقره نك چیقارلسی وانکلتزه عسکرینك بولندقلری محللردن ایلرو کیتاملری صورتك استحصانه دخی چالیشمسی و طرف دولت علیه دن سوق اولنه جق عسا کر شاهانه نك تعیین و تصریح مقداری ایچون آچیق براغیلان محله لزومنه کوره پی درپی کوندرلك اوزره برقول اردو تعبیری یازلمسی وایکنجی ماده ده عسا کر شاهانه نك حقیقه جقلری موقعك تعیینی ایچون آچیق براغیلان محله دخی اسکندریه و پورت سعید دیوتحریر ایدلمسی و عسا کر شاهانه نك انکلتزه عسکری باش قوماندانك موافقتی منضم اولدقده هیچ برطرفده بولنه میه جفته و عسکرک برقمسی ایچون هیچ برتدیر اتحاد ایدلیه جکنه دائر اولان اوچنجی ماده منفعت و مقصد دولته الیریمیه جکندن بوماده نك کلیاً طی ایدلمسی و عسا کر عثمانیه اردو کاهنده بریوک ضابطك قومیسر صغیله بولنه جفته دائر اولان بشنجی ماده نك دخی هرا یکی طرف اردو سنده تسهیل مخبرات ایچون رتبه لری یکدیگرینه معادل

طرفیندن برر ضابط بولندیرلمسی یولنده تصحیح اولنسی لازمه دن
عدا ولنمعله ذاتاً لایحه مذکوره تعدیل وتصحیحه قابل اولق اوزره
مرخص اول پاشا طرفندن قلمه آلمش بولنمعله صور معروضه یه توفیقاً
مذاکره سنه کیریشیله رك تعدیل وتصحیحه صرف مساعی اولنسی
وممكن اوله مدینی حالد تکرار مذاکره ایدلسی وقومیسرلرله قوماندان
پاشانك عزیمتلینك عساكر شاهانه نك عزیمته تعلیق قرارلشدیرلدی .
قدری افندیك تلغرافی عرابی فرقه سنك ضعیفه برابر ایچلرنده فن
حربه واقف ضابط بولندیغنی وسودان ایچنده نفوذلری اولدیغنی
مبین اولغله مذکور تلغراف اوراق سائر ایله برابر طاقیله اعاده
وتقدیم قلندی ایسه ده اولبابده . »

ل ۲۷ رمضان سنه ۹۹ و ل ۳۰ تموز سنه ۹۸

بالاده کی وثیقه قونفرانسك بر شیئه یاراماش اولدینی
حقنده کی مقالی ابطاله کافی اولدینی کی دفعات مختلفه ده اجتماع
ایدن مجلس مکالمه نك هر دفعه اجتماعی مذاکراتنده حقوق
ومنافعمر تأمین اولنش اولدینی مکالمات مضبطه لرینه باقیلیرسه
دفعه ثابت اولور . لکن انکلیر عسکری اسکندریه وپورت
سعیده بولندقلری حالد عثمانلی عسکرینك دخی اوراده
وجودی طرفین عسکری بیننده تضادی دعوت ایده بیلیمك
ملحوظ اولدیغندن عساكر عثمانیه نك ابوقیره چیقارلمسی
حقنده سفارتك طوغریدن طوغری یه اظهار ایتدیکی مطلبه
خاقان سابق طرفندن بالذات موافقت اولندیغنی واسطه تبلیغ
خارجیه ناظری سعید پاشا ایله کاتب خصوصی رشید بك حاضر
اولدقلری انکلتره سفیری طرفندن صدارته بیلدیرلمشدی .

بوراسی خاقان سابقه بیان اولدوقده موافقت و تبلیغنی تصدیق
ایتمیوب بالعکس ابوقیرک ترکی سویلتدیردیکنی بیان ایتیش و اوللابده
خارجیه ناظری سعید پاشا ایله رشید بکدن آلدیغی ورقه یی
مقام احتجاجده مجلس وکلایه کوندرمش ایدی . بو ورقه نك
اووقت مستشار اولان ذهنی افندی (ذهنی پاشا) قلمی ایله
استساخ ایتدیریلان صورتی نزدیمده محفوظدر . بونی تذکیردن
مقصدم شونی بیلدیرمکدرکه بوماده وبالالتزام ایقاع اولنان موانع
مثاله ایله بین الدولتین عقدی مقرر اولان مقاولهء عسکریه برآز
تأخرا ایتیش ایسه ده تأخرات و مشکلات محدثه مساعیء واقعه ایله کاملاً
ازاله ایدلمشدی . حتی مقاولهء عسکریه نك دردنجی ماده سندم
انکلتره نك تکلیفی « انکلیز و عثمانلی عسکرینك اعزاملرینه
سبب اولان حال بر طرف اولدوقده طرفین متعاقدین عسکری
ملکیتی تخلیه ایدمک و عساکر عثمانیه انکلیز عسکريله بر
وقته ملکیتی تخلیه ایدمکدردر » قیدینی حاوی ایکن بز
« مصرده تدابیر عسکریه اتخاذهنی ایجاب ایتدیرن اسباب مندفع
اولنجه انکلیز عسکری ملکیتی تخلیه ایلیمکدردر . لزوم
کوروندیکی تقدیرده عساکر عثمانیه نك مصرده تمديد اقامتلرینه
صلاحیتلری اوله جقدر » ماده سنی نکلیف متقابل اولمق اوزره
بیان ایتدی کمزدن مجرد تألیف بین ایچون انکلتره سفیری
« مصرده تدابیر عسکریه اتخاذهنی ایجاب ایتدیرن اسباب
مندفع اولنجه طرفین عسکری ملکیتی تخلیه ایدمکدردر .

مع مافیه لزوم کوروندیکی تقدیرده عسا کر عثمانیه طرفین
 متعاقبین بینده حاصل اوله-حق اتفاق اوزرینه مصرده تمدید
 اقامت ایلده جکدر « فقره-سنی تکلیف ایش و مقاوله طرفین
 مرخصلری بینده پارافه دخی ایدیش ایدی . بویله شیلرده
 موفقیتک شرفی دولته عائد اولوب مکالمات واجرا آته واسطه
 اولانلرک حرکتلری وظیفه طبعیه لرینی ایفادن عبارت عد
 اولنق لازم کلیرکن هر فصله خدمت طبعیه ناجیزانه اعظام
 اولنه رق موفقیتمی کسروابطال ایچون مقاوله عسکریه درلو درلو
 تقیصه لر اسناد اولنش وعقبنده « تل الکیر » محاربه سی عرایینک
 هزیمتی ایله نتیجه بولدیغدن عقد مقاوله یه محل قالمش ایدی .
 بونلر تفصیلاتی ایله کامل پاشا حضرتلرینک خاطرلرنده اولسه
 کرکدر . ایشه ایلاک فرصت بووجهله ضایع اولمش ایدی .
 ایکنجی فرصتک ده نه صورتله اضاعه ایدلدیکنی تفصیله کیرمزدن
 اول کامل پاشا خاطراتنک یکریمی ایکنجی تحیفه-سندده محرر
 وجریان حاله مغایر اولان مباحثی موقع محاکمه یه قویمق لازم
 کلیور . مشالیه دییورکه : « ینه سلف عاجزی سعید پاشانک
 صدارتی هنکامنده ومصرجه قوه عسکریه نک هنوز تحت
 انتظامه آلمدینی ائنده ، سنوی اون بش بیات لیرا ویرکوسی ،
 سنه-بسنه خزینه مالیه یه ارسال اولنق اوزره اداره سی خدیوک
 ذاته محول اولان مع ملحقات مصوعک حسب-الحال ضبط
 وربطی کسب مشکلات ایلدیکی جهته عسا کر مصریه اورادن

قالدیریلہ جفندن مصوعك كالقديم تحت اداره دولته آلمسی
 خدیو سابق توفیق پاشا طرفندن اشعار وانکلتزه دولتی بو خصوصه
 دائر اولان تبلیغاتنده (صومالی) داخلنده واقع بربره نك
 (زیلعه) قدر متمد اولان قسمنده، یعنی باب المندب ایله زیلع
 بیتنده کی اراضی اوزرنده سلطنت سنیه نك حق حاکمیتی انکلتزه جه
 تصدیق اولنماش ايسه ده اسرا تجارتی منع ایدلک وهیچ بر
 اجنبی دولته یر ترك اولنماق وانکلتزه ایله خدیویت بیتنده
 منعقد مقاوله نامه ده معین رسومدن غیری رسم آلمانق شرطیه
 باب عالی مصر عسکرینك حین رجعتنده (تاجوره) ایله زیلع
 اوزرنده کی حکم ونفوذنی محافظه ایچون تدابیر مقتضیه اتخاذه
 مقتدر بولونورسه دولت علیه نك زیلعه قدر متمد اولان زوت تحت
 اداره مصریه ده بولان ساحلک بو قسمی اوزرنده کی حکم
 ونفوذی انکلتزه دولتی طرفندن تصدیق اولنه بیه چکی وعکس
 تقدیرده آسایش وانتظامی محافظه زیلعك انکلتزه طرفندن
 اشغاله مجبوریت حاصل اوله جنی اخطار اولندینی حالده باب عالی
 اورالرك طوغریدن طوغرییه تحت اداره یه آلمسی استاتوقو
 اساسنی اخلاص ایدره ك محاذیری داعی اوله جنی ملاحظه سییه
 بویابده خدیو ایله اتحاد افکار حصولدن صوکر دولتره بالیان
 اتخاذ تدابیر اولنسی رأینده بولنش و حال بوکه خدیو اورالرك
 محافظه سنه عدم اقتدارینی بیان ایله طرف دولت علیه دن تحت
 محافظه یه آلمسی اولجه باب عالی یه عرض ایلش ایدی . »

۳۰۰ سنه سی کانون نائینسک یکر می بری تاریخیه خدیویت
مصریه کوندر دیکم تلغراف مصوعه دائر خاطر اتده مندرج
حکایاتی نقضه کافی اولمغله اول باول آنک بر صورتی آتیده
درج اولندی :

« ایتالیانک مصوعی اشغال تصمیمنده بولندیغنه فقط بو ماده
طوغریدن طوغریه اجرا اولنسه علناً بر حرکت تجاوزکاری
اوله جفندن بونی شکل مشروعبته تقریب ایچون ذات عالی خدیولرینک
هیچ اولزسه موافقت ضمیمه سنی استحصال اسبابی تحری ایتدیکنه
دائر رومادن بعض خبرلر آلیور . کرچه ایتالیا دولتی روایت
واقعیهی رسماً تکذیب ایتکده اولدینی کی مصوعی طوتمق
ایچون ابتدا لوندره قابینه سنه مراجعت ایتدیکنده لورد غرانویل
اوراسی ممالک شاهانه دن اولدیغندن ایتالیانک بویله بر نیتمز ترویج
ایده میه جکنی مکرراً بیان ایلش ایسه ده استخبارات واقعیه ک شکل
وماهیتی بالوجوه نظر دقتی داعیدر . دولت علیه مسئله مصریهی
حقوق حکمرانیه و خدیویت جلیله لرینک امتیازاته موافق وذات عالی
آصفانه لرینک بقای نفوذ واقتدارینی کافل اوله جق صورته تسویه
اسبابیه مشغول اولمقده ایکن سواحل بحر احمره اوپله بر بشقه دولت
طرفندن دخی تجاوز و قوعه کله جک اولور ایسه مصر مسئله سنک
از سرنو کرک دولت علیه ک و کرک خدیویت جلیله لرینک منافعه ضد
ومشکل بر شکه کیره جکی عند حقایق دانئ عالی رنده محتاج تعریف
دکدر . ایتالیانک خدیویت جلیله لرینه اسناد ایده جکی موافقت ضمیمه
اولسه اولسه مصوعک عسا کر مصریه دن تخلیه سی ماده سی اولق
لازم کلوب کچنده واقع اولان اشعارات فخیانه لرینه نظراً قوه جنودی
مصریه ک شیمدیکی مقداری سواحلک محافظه سنه کافی حاله اولدینی
اکلاشیله یور ایسه ده اجابه قارشو امر محافظه عسا کرک کثرت

وقتندہ اولیوب مملکتک حکومت موضوعہ دن رسماً خالی اولامسی ویک جزئی بر عسکرک وجودی امر تصرفی ایفا ایدہ جکی جہتہ مصوعده بولنان ہیئت حکومت وژاندارمه و آرز چوق نہ قدر عسکر وار ایسه انلر شاید چکیلہ جک اولورلر ایسه ایشتہ ایتالیا ناک ارادینی مساع ضمنی اول وقت حاصل اولہ جفندن بوکا محل ویرلامسی ہم سنیہ مہامشناسیلرینہ تودیع اولنور اولبا بدہ . »

یوقاریدہ درج اولنان تلغراف تاریخندن اوچ کون صکرہ جواباً خدیویتہ بروجه آتی بر تلغراف دہا کوندرلمشدی :

« ۲۳ کانون ثانی ۳۰۰ تاریخلی تلغرافنامہ جوابی آصفانہ لری آلدی . ایتالیا ناک بیلولہ چیقان عسکری اون اون بش نفر کمی عسکرندن عبارت اولوب آنلرک دہ عودت ایتمک اوزرہ اولدقلرینی و دولت علیہ ناک بحر احمر سواحلندہ اولان حقوق مالکیتنہ دولت متبوعہ سنک رعایتی آلدینی تعلیمات اوزرینہ ایتالیا ناک درسعادت سفیری خارجہ نظارتہ تبلیغ ایتدیکی وموسیو مانجینینک دخی سفارت سنیہ یہ اعطای تأمینات ایتمکدہ اولدینی نظارت مشار الیہادن افادہ قلمش ایسہ دہ ایتالیا قوماندانک بیلولہ کی عسا کر مصریہ قوماندانی طرفندن وقوعہ کلن ممانعتی دیکلہ میوب وعسا کر مرقومہ ناک سلاحلرینی جبراً آلوب آنلری اخراج ایلہ معیتی عسکرینی اورایہ یرلشد یردیکی اشعار عالیٰ فخیانہ لریلہ تحقیق ایدرک بوایسہ تأمینات واقعہ یہ و حقوق دول ومللہ مغایر بررورش ناشنیدہ اولدینندن باب عالیجہ روما قابینہ سیلہ دول سائرہ نزدندہ تشببات مؤثرہ اجرا اولنمش وتلغرافنامہ فخیانہ لری مجلس وکلادہ بالتقرائہ حضورهایون حضرت پادشاهی یہ عرض قلمشدر . روش حال ایتالیا ناک مصوعی مطمح نظر ایلدیکنہ دلالت ایتمکدہ اولمغاہ و بوتصور فعلاہ کلیر ایسہ مضرت حالیہ ومستقبلہ سی حساب و قیاسدن خارج اولہ جنی واقف حقایق احوال اولان ذات عالیٰ

فخیانه لرینه تعریفدن مستغنی بولمغله اشعار سابق عاجزی وجهله استکمال تدابیر مانعیه عنایت مخصوصه آصفانه لری رجا و اخطار قلنور اولبا بده »

۲۴ کانون ثانی ۳۰۰

ایکنجی تلغرافدن درت کون صکره خدیویتیه بر تلغراف و آندن بر کون صکره ده دیگر بر تلغراف ده کوندرم شدم صورتلری شونلردر :

« سواحل بحر اهرده بعض نقطه لری اشغال ایچون ایتالیا خدیویت جلیله لرینک موافقت ضمنیه سنی تحری ایتدیکی روما سفارت سنیه سندن باب عالییه اخبار اولمغله تدابیر مانعه اتخاذی ضمننده اولجه طرف عالی آصفانه لرینه معلومات ویرلمش ایدی . جواباً آلمان تلغرافنامه سامی فخیانه لرنده ایتالیانک بیلوه کوروب اوراده کی عسا کر مستحفظه مصریه نک سلاحرینی دخی طوبلادیغی اشعار بیورلمغله بوندن طولای باب عالینک روما قابینه سیله سائر دولتلر نزدنده نه صورتله اجرای تشبثاته مسارعت ایتدیکی وایتالیانک مطمح نظری مصوع اولدیغنه دائر سبق ایدن اخطارک مستند علیهی بولنان خبر تأید ایتمه اولبا بده دقت علیه فخیانه لرینک لزوم انعطافی ومذکور تلغرافنامه سامیلری مجلس وکلا قراریه حضور هایون حضرت پادشاهییه عرض اولندیغی دخی ایکنجی تلغرافنامه عاجزیده بیان قلنمشدی . ایتالیانک عسکرینی حامله بحر اهره کوندردیکی حرب سفینه سی قوماندانه بیلوه کیرمزدن اول کشفیات اجرا ایدرک جدی بر مخالفت حس اولنورایسه عسا کر مرقومه نک اورایه اخراجندن صرف نظرله عصبیه متوجهاً یولنه دوام ایلسی ایچون تعلیمات ویرمش اولدیغی بوکون روما سفارت سنیه سندن معروض معلوماتده باب عالییه بیلدیرلمش و بیلوه کیردیکی طرف عالی خدیویلرندن اشعار بیوریلان ایتالیا عسکرینک اورادن چکلمسی ایتالیا دولته تبلیغ قلنمسی اوزرینه موسیو مانجینی حرکت

واقعہ میں تصدیق صورتندہ بولمیبوب دولت متبوعہ سی اراضی و حقوق
حاکمیتہ خلل کثیر مامک عزم قویسندہ اولدیغنی سفارت دولت علیہ
بیان ایتمش اولدیفندن تبلیغات سابقہ میں اکالاً بوخصوصتک طرف
عالی آصفانہ لرینہ اخباری لازمہ دن عد اولندی . تلغرافنامہ معروضہ
کلنجہ ایتالیا عسکرینک بیلولی نہ قدر قوتله اشغال ایلدیکنک واشغالک
شکل حاضرینک والیوم مصوعک نہ حالہ بولندیغنیک سریعاً جانب
سامی خدیویلرندن استعلامنہ ارادہ سنیہ حضرت خلافتپناهی متعلق
بیورلش اولغله برمنطوق ارادہ سنیہ کیفیات محررہ نک اشعار و توضیحہ
هم سامیہ فخیانہ لری شایان بیورلوق باندہ »

۳۸ کانون ثانی ۳۰۰

— دیگر تلغراف —

« ایتالیا ناک بیلولی نہ قدر عسکرلہ طوتدینی و مصوعک حالی دونکی
تاریخی تلغرافنامہ عاجزانہ ملہ استعلام اولمشیدی انک جوابی آلنزدن
اول ۲۲ ربیع الثانی ۳۰۲ تاریخی تلغرافنامہ سامی فخیانہ لری شمدی
اخذ اولنوب مآلندن ایتالیا لولرک مصوعہ تاریخ و صورت دخولری
و طرف عالیلرندن ایتالیا جترال قونسلسنہ نہ وجہلہ پروتستو نامہ
ویرلدیکی و مصوع محافظلغیلہ برابرندہ کی عسا کر مصریہ اوراسنی ترک
ایتمیبوب مصوعده باقی اولدقلمری معلوم اولدی و اول باول حقوق دول
ومالی نفی و دولت علیہ ویردیکی تأمینات رسمیه نفی ایدن شو
حاکم ایتالیا دولتنہ اخطار و دیگر دولتلر تزدندہ تشبہات لازمہ اجرا
اولنمی خارجیہ نظارتنہ بیلدیرلدی تلغرافنامہ سامیلری دخی مجلس
وکلایہ تبلیغ و حضورهایون حضرت پادشاهیہ عرض اولنق اوزرہ درہ
ذات حقایقسمات خدیویلرینہ تعلیمات و تدریفاتہ حاجت یوق ایسہدہ
مصوع محافظیلہ معیتی عسکرینک کما کان اورادہ قالمری و یا خود ایتالیا
عسکرینک دخولرینہ بناء بیلولده اولدینی کی مملکتی ترک ایتلمری
بربرندن فرقلی مادہ لر اولوب برنجیسی محافظہ حق مملکت و مداخلہ »

أجنيبه نك امتدادينه حيلوت ايجون قاعدهً وفي نفس الامر بر مخلص
فعلي اولسنه نظراً بو باده متخذ اولان تدابيرك تقديرينه مسارت
قلنور اولبايده »

٣٩ كانون ثاني ١٣٠٠

شومخبرات واضحاً اثبات ايدر كه مصوعك اسباب استيلاسي
كامل پاشانك ديدكي كي دكلدر و كرك اوراسي و كرك بيلول
ايجون باب عالي وظيفه سني ايفاوخديوتي و قتيه ايقاظ ايتشدرد.
لكن او وقت خديو بولنان توفيق پاشانك مادهً و معناً عدم
اقتداري و باب عالي دن يازيلان وصاياسي تقدير ايدمه ميسي حصول
مقصده مانع اولدي .

كامل پاشانك خاطراتنده التزام اولنان و فقط نفس الامرده
توافق ايتيمان تخطئه يه « سلف عاجزي سعيد پاشانك صدارتي
هنكامنده و مصرجه قوه عسكريه نك هنوز تحت انتظامه آلمديني
اشاده سنوي اون بش بيك ايرا ويركوسي سنه بسنه خزينه
ماليه ارسال اولمق اوزره اداره سي خديوك ذاته محول اولان
مع ملحقات مصوعك حسب الحال ضبط و ربطى كسب مشكلات
ايتشدري » مقدمه سيله باشلانمش ايسه ده اولاً مبدأ بحث ياكلش
اولوب خاتمه يه قدر سهويات دوام ايتشدرد. مقدمه ذهوله مقرون
اولديني شونكه ثابتدر كه سنوي اون بش بيك ايرا ويرمك
اوزره اداره سي مصره ترك اولنان محل زيلعدر . خاطراتك
او عباره سنده موجود اولان « سعيد پاشانك صدارتي هنكامنده »
ظرف مستقري مابعدنده بولنان « محول » كلمه سنه مي يوقسه

« حسب الحال ضبط وربطی کسب مشکلات ایلدیکي » عباره -
 سنه می راجع اولیور بوراسی خاطر اتده معقد و تعقیدده کی
 مقصد مجهولدر . اذهانی بلا موجب تردید ایته مک ایچون
 شوراسی ده تصحیح اونور که زیلع ۹۲ تاریخده خدیویته
 ترک اولمشدر . و امر ترک خاطر اتده دینلیدی کبی مصرجه
 قوه عسکریه نك هنوز تحت انتظامه آلمدینی ائنده دکل خدیو
 اسبق اسماعیل پاشانک مصرده واستانبولده قوت و نفوذی جاری
 اولدینی زمانده در . و زیلع خدیوک ذاتنه دکل خدیویته
 ویرلدیکندن فرامین عالییه ایله تأمین اولنان اراضی
 منضمه داخلنده در خدیویته ویرلمسی اسبابی صدد بحث
 خارجنده بولمقله آتی تفصیلدن صرف نظر ایدلدی . تاجوریه
 کلنجه حق ملکیت فرانسسه طرفندن تصدیق اولنیور
 ایسه ده زمان مأموریتده بوراسی ممالک عثمانیه دن اولدیغنده
 اصرار ایدلمکده ایدی انفصالم وقوعنه مبنی تشبثاتک اکیلی کامل
 پاشا قابینه سنه انتقال ایلشدی . زمانده کی معامله نك تفصیلی
 معلوم اولمق ایچون مجلس وکلانک ضبطی صورتی بروجه آتی
 درج اولنور ؛

« تاجوریه نك فرانسزلر طرفندن اشغاله دائر موسیو ژوله فری
 طرفندن پارس سفارت سنیه سنه ویریلن تقریرده بیک سکزیوز آلتش
 سنه سنده یمن ولایتنه کوندریلن تحریرات سامیه ایله خدیویت جلیله نك
 طور وحرکاته استناد اولنمقده ایسه ده لدی التجری تحریرات مذکوره
 بولدیریله مامش و تاجورانک فرانسزلر طرفندن اشغاله مصر قوماندانک

موافقت ایلدیکی دخی جمله اشعاردن بولنمش اولمسیله کیفیتک خدیویت
 مشارالیهان استفساری حقنده خارجیه نظارتک ۱۲ ربیع الاول ۳۰۲
 تاریخلی تذکره سی قرائت اولندی تحریرات مبحوئه نك مرحوم عالی
 پاشا طرفندن ولایت مذکوریه ارسال قلندی نی مذکور تقریرده
 [فرانسه خارجیه ناظرینک سفارت سنیه یه ویردیکی تقریرده] بیان
 اولنیور ایسه ده باب عالیدن وقتیه بویه بر مکتوب اسطار اولنمش
 ایسه قیدی بولنه مدیغندن بحثله خدیویتدن سؤال غعلته دلالت ایدرک
 پکده مناسب اولمیه جغندن تلفرافله یمن ولایتدن صورلمسی ووقتیه
 تاجورا ایچون خارجیه نظارتیه فرانسه سفارتی ویاخود پارس سفارت
 سنیه سی بیننده البت بعض مخبرات کجمش اوله جغندن بورانسک
 بیلنمی ایچون دخی قیودک تنبع ایدلمسی حقنده ظهر تذکره ده
 محرر اشارت وجهله خارجیه نظارتنه تذکره یازلش اولغله بونک
 جوابنه انتظار اولنمی ویاخود شیمیدین بر تدبیر وار ایسه انک
 اجراسی طرف سامی صدرتدن سؤال اولنمی اوزرینه اول امرده
 ذکر اولنان تحریراتک کورلمسی لزومنه مبنی انک ورودینه انتظار
 ایدلسنه قرار ویرلدی . »

خاطراتک یکرمی ایکنجی صحیفه سننده وجل معهود
 صره سننده اولاً باب المنذب ایله زیلع بیننده کی اراضی اوزرنده
 سلطنت سنیه نك حق حاکیتی انکلتزه جه تصدیق اولنماش
 اولدیغنه ثانیاً انکلتزه حکومتی بو خطه ده حاکیتمزک تصدیقی
 بعض شرائطه تعلیق ایدیلدیکنسه دائر ایکی مقدمه دخی
 کورل دیسه ده نتیجه لرینی معلومات سابقه ایله توفیق ایده مدم
 حسن فهمی پاشا لوندرده ایکن موزوروس پاشا ایله
 مشترکاً و مشارالیهک عودتندن صوکره موزوروس پاشانک

مفرداً بحر احمر ساحلرینه دائر متعدد تلغرافلری آلمشدی.
بونلرک ۷۱، ۹۳، ۹۴، ۹۷، ۹۹، ۱۷۴، ۲۸۷ نومرولرله مرقم اولدیغنی
قیودمدن آکلا یورم .

موزوروس پاشانک صوک تلغرافنده انکلتره دولتی مصری
سریعاً تخلیه یه قرار ویردیکنی، بحراحرلیمانلرینه دولت علیه نك
عسکر سوق ایتیمی لزومنی وبو خصوصده دولتین بیننده عقد
ائتلافه حاضر بولندیغنی لوردقرومرک بیان ایلدیکی محررایدی
۳۰۲ سنه سی شعباننک آلتنجی کونی انعقاد ایدن مجلس وکلاده
مذاکره کیفیت اولندی . دولت علیه سواحل مذکورهدی
هرزمان اداره یه حاضر ایسه ده اول امرده استیلان ائتلافک
اساسلری نه اولدیغنی آکلامغه مجبور اولدیغندن وبوراسی تعین
ایتدکده کندی قرارینی مسارعه ویره جکندن اول باول
مذکور اساسلرک واضحاً بیان اولمنسی لوندرده قاینه سنه تبلیغ
ایتیمی یولنده سفیرمزه تعلیمات کوندرلمش ایدی . انکلتره
دولتنک سیر دورموندوولفی سفارت فوق العاده ایله استانبوله
کوندرمسی مسئله مصریه نك هرجهتی حقنده بالمذاکره ائتلافات
حاصل ایتک مقصودیله ایدی که بحراحر سواحلنک
اشغالی ماده سی ده بوکا داخل ایدی . خاطرلرده درکه دورموند .
وولف ایکی دفعه استانبوله کلدی . برنجیسی نیم زمان مأموریتده
ایدی . فقط بر آی صکره صدارت کامل پاشا عهده سنه تفویض
اولندیغندن بحراحر ساحلاری ایچون صورت ائتلافیه استحصالی

وظیفه‌سی مشارالیه انتقال ایتش ایکن وولفله یاییلان برنجی
مقاوله‌ده هر نصلسه سواحلك دولت علیه طرفدن اشغالی
مسئله‌سی دخی مسكوت عنها براقيلمش وینه مشارالیهك زمان
صدارتنده تجدیداً تنظیم اولنان سويش قتالی مقاوله‌سنده
هر نصلسه بحر احمر ساحلرینك جهت غربیه‌سی دولت علیه‌ك
تحت حكمنده كوسترلیوب یالكز قطعه شرقیه‌سنی بیان ایله
اكتفا ایدلمش اولمسیله سواحل غربیه وضع ید ایدن دولترك
مداخله‌لری نوعما شكل مشروعیت كسب ایتشدر . سواحل
مذكوره‌ده حق ملكیت مزه خلل طاری اولسنك سیلیرینی
وولف مقاوله‌سیله سويش قتالی مقاوله‌سنده آرامق لازم
كله‌جكندن كامل پاشا خاطراتنك ۲۲ و ۲۳ نجی صحیفه‌لرنده‌کی
مدافعه اصلاً بحق وواقع حاله موافق دكلدر .

كامل پاشا خاطراتنك اون سكزننجی صحیفه‌سنده « دولت
مشارالیه طرفدن مرخص اوله‌رق تعیین واعزام قلنان سیر
دورموند وولف ایله میانده‌ده بالذا كره بر مقاوله‌نامه دخی عقد
اولنمش ایدی . او ائشاده كندم اوقاف ناظری اولدیغم حالده
خارجیه ناظری عاصم پاشا ایله معاً بومذا كریه مأموریورلمش
ایدم . فرداسی سنه مسند صدارت عهدۀ عاجزانمه توجیه
بیورلمسیله مصر مسئله‌سیله باشلیجه مشغول اوله‌رق ... الخ »
دیمشدر . واقعا اوائشاده بشقه‌سی دكل كندیسی اوقاف ناظری
ایدی و مرخص ثانیلكه تعیین قلمش ایدی . بو خصوصده‌کی

تذکره معروضه امیشک مقدمه سنی و مرخصلرمزك صورت
تعیینی ارانه ایده جکندن کورلسی فائددن خالی اوله من .
تذکره معروضه

« انکلتزه سفیر فوق العاده سیله مسئله مصریه نك مذاکره سی
ایچون طرف اشرف جناب شهریاریدن خارجیه و اوقاف هایون ناظرلری
پاشا و درجه نالهده اوله ق عدلیه ناظرلی حسن فهمی پاشا حضراتنك
تعیینی تظیر بیورلدیغی بیانیله مشار الیه مدن قنغیسنك بو مأموریت
مهمهده بولندیرلسی مناسب و مرجع اوله جنك مجلس و کلاجه
مذاکره تعلیق اولتمسزین عرضی اراده سنی جناب پادشاهی
اقتضاسندن اولدیغی مبین ۱۸ ذی القعدة ۳۰۳ تاریخلی تذکره خصوصیه
علیه لری آلدی . خارجیه ناظرلی پاشا حضراتلرینك معاملات و لسان
دیپلوماسیه وقوفی و مصالحده تجربه سی دها زیاده ایسهده صفت
مأموریتی ایجابجه دائماً سفرای اجنبیه ایله ملاقاتی طیبی اولوب انلرایسه
مصالح مصریه جقنده انکلتزه سفیریه نصل مذاکره جریان ایتمکده
اولدیغی نظارتدن سؤال و تفحص ایده جکلری طبیعت مصلحتو دلائل
حالیله و ماضیه نظرأ امور مجزومه دن اوله رق کرچه دولت علیه مسئله
مذکوره جه سائر دول متحابه دن امین اولق لازم کلور ایسهده بیانه
حاجت اولدیغی اوزره بو مثالو مذاکراتدن لزوم طیبی مس ایتدجه
سفرای سائریه تفصیلات ویرلسی قاعدهیه و ایجاب حاله موافق دوشمیه جکی
ونظارت خارجیه دن سفیرلرک سؤال و تنقیدلرینه مقابل اجوبه کافیه
ویرلامسی دخی آنلرجه عدم امنیت حمل اولتمسنه سبب اوله رق بودخی
محذوری بولندیغی جهته مشارالیه خارجیه ناظرلی حضراتلرینك انکلیر
ایلچیسيله واقع اوله جق مذاکره بدایه توسیظندن ایسه کامل یاشا
ویا حسن فهمی پاشا حضراتندن برینك بواشده بولندیرلسی مصلحت
و منفعت دولته موافق اولوب بناء علیه مشارالیهما بیننده وجه ترجیح

آرانلقدده مشارالیه حسن فهمی پاشا انکلتزه وکلای سابقه سنی بالذات کوروب آنلرک افکار و نظریاتنه وقوف حاصل ایتمش اولسیله مذاکرات جدیدده انکلتزه ایلچیسله اشبو معلومات اوزرینه مباحثه و مذاکره نکره لروم و قائده سی درکار اولدینی کبی سفیر مشارالیه ک مذاکره سنه مأمور اولدینی شیلر البت حسن فهمی پاشا حضرتلرینک مسئله مصریه جه انکلتزه دولتیله تذکر ایتدیکی مواده تعلق ایده جکندن انلرک مذاکرات سابقه سی نه درجه ده قالمش واسکی قایینه ایله عدم حصول ائتلاف نه کبی احوال واسبابه مستند بولنمش اولدیغنک مذاکرات جدیدده بیلنوب درمیان ایدلسی کذاک مصلحه موجب منفعت اوله جنی و بونکله برابر اشبو مذاکراتک کسب ایده جکی نتایج مجلس و کلاجه دخی درمیان اوله جنی جه تله سفیر ایله جریان ایده جک مذاکرات ابتدائیه مشارالیه حسن فهمی پاشا حضرتلرینک وساطت مأموریتی انسب کو و اش ایسه ده اراده سنی حضرت پادشاهی هر نه وجهله شرفسنوح و صدور بیوریلور ایسه اصابت آنده اوله جنی درکار بولمشدر افندم . »

۱۸ ذی لقعه ۳۷۲ و ۱۷ اوستوس ۳۰۱

حسن فهمی پاشانک تعینی خاقان سابق نزدنده قبول اولنمیب اراده کامل پاشانک مأموریتته تعلق ایتدیکندن عاصم و کامل پاشالر مکالمه به بدأ ایتدیلر . مکالمه اولی نتیجه سننده مشارالیه مانک مقام صدارته و یردکلی تقریر مشترک مسئله نکر اشکال اخیره سی اعتباریه شایان دقت وثیقه لر دن اولدیغندن صورتی آتیده درج اولنه جق ایسه ده بو مکالمه نکر وقوعندن اولکی حال که سیر دوروموند و ولفله بنم ملاقاتمه متعلقدر دها زیاده امعان نظری جالب اولمغله اول باول آنی قید ایتک تاریخ نقطه نظرندن قائده لیدر . عاصم و کامل پاشالرک

مرخصه تعیین کردن مقدم سیر دور و موند و ولفه وقوع بولان
مکالمه مده مصرک آز بر مدت ایچسده تخلیه سی و او یوله
بر مقاوله صریحه عقدی ایچون کوستردیکم لزومی مشارالیه
حسن صورتله تلقی ایتش ایدی . فروغ مسئلهیه متعلق
مذاکراتدن دخی آتیا مرکز ائتلافه واصل اوله جعفرده
دائر هم مشارالیه وهم ده بکا اطمینان کمش ایدی .

بواطمینان متقابلدن منبعث اولمی که مشارالیه دور و موند و ولف
ایلیک ملاقاتنده خاقان سابقه مکالمهیه مأموریتمدن ده بحث ایتش
ایدی . عاصم و کامل پاشارک مأموریتلرندن صوکره سفیرک
اظہار ایلدیکی افکار ائتلافکاری ملاقات خصوصیهده حس
ایلدیکم میلان درجه سنده دکل ایدیسهده اساساً و علی الخصوص
کامل پاشانک صدارتی زماننده برنجی دفعه عقد اولنان و خاطراتک
اوتوز برنجی و اوتوز ایکنجی صحیفه لرنده صورتی مسطور
بولنان مقاولهیه نسبة قاندهلی و توسیعه قابل تکلیفلی شامل
ایدی . نته کیم مرخصلر طرفدن مکالمه ابتدائیهیه دائر صدارته
ویریلن و آتیده صورتی یازیلان تقریر مشترک دخی بوکا
دلالت ایدر :

« بوکون ساعت یدی بحق راده لرنده انکلتزه مرخصی
سیر هانری دور و موند و ولف دائره نظارته کلکه اولنان
اجتماعده « اشبو اجتماعنر مصر مسئله سنه دائر شایان مذاکره
اولان موادک مقدماتی شفاهاً سویلشمکدن عبارت اوله جنی

جهتله مسئله مذكوره حقدده ارزو واراده سنيه حضرت
پادشاهي نه مركزده ايدوكي اوكرنيلمش اولسه اكا توفيق
مذاكره اولنور ايدوكني « بيان ايتسي اوزرينه ارزو واراده
شاهانه خطه مصريده اولان حقوق حكمراني سلطنت سنيه
ايله بافرامين عاليه خديويت مصريه ويرلمش اولان امتيازاتك
محافظه سي اولديني وبوده انكلتره حكومتجه هربار تصديق
قلنديني طرف چاكرانه مزدن افاده وبواساس اوزرينه
كندولرنجه تصور اولنان چاره نك نه مركزده ايدوكي استفهام
اولندقدده بواساسك كندوسنجه دخی موافق حق اولديني
تصديق ايله برابر ابتدا سودانده اعاده آسایش ماده سنی درمیان
ايدرك سواكنه عساكر عثمانیه ارسالی موافق رضای عالی
اولوب اولمديني سؤال ايتسييله بوماده مسئله مصريه نك فروعاتندن
اولديغندن اول امرده مصر حقدده اولان مطالعه سي صورلمش وبوكا
جواباً دولت عليه نك مصره عسکر كوندرمىسنه انكلتره جه برشي
دينلمزسه ده بوكا فرانسه راضی اولمديني وبونك سببي ايسه
ظاهراً جزایر وتونسه سوء تأثیری اولور واهمه سنه مبنی اولوب
فقط اكر مصره عساكر عثمانیه كوندرمىك مراد اولنور ايسه
بوكاده بر چاره بولنه بيله جكنی سويش اولديغندن ينه مذاكره
سواكنه انتقال ايتمكه اورايه عساكر شاهانه ارسالی حالده
اليوم اوراده وسودانك جهات سائرهنده بولنان انگليز
عسكرينك اخراجندن اول وياخود صكره می اوله جني

لدى الاستفهام فى الواقع دولتين عسكريك بولنسنده اولان
تراكى كندوسى دريش ايلدىكى مثللو سودان عصيانك
شككه نظراً عساكر شاهانهك سودانه مخارب بولنان انگيز
عسكريه برلكده بولنسى حالده دولت عليه عصيانك تسكىنى
ضمنده استعمال ايدوبيله جكى وسائط صلحيه يى تأثيرى
براقه جنى و بناءً عليه دولتين عسكريك اجتماعى جائز اوليه جنى
ماده سى دخى طرف چا كرانه مزدن درميان اولنسى اوزرينه
ماده نك شايان ملاحظه اولان بوجهتى بعده بالتأمل مطالعه سنى
بيان ايله جكنى افاده اينمىدر .

مصر ك انگيز عسكرندن تخليه سى بحثه نقل مقال اولند قدده
بونك ايچون مدت تعينى مشكل ايسه ده مصر دن انگيز
عسكريك نه وقت چقه جنى بيلمكه قناعت بخش اوله جق
درجه ده تأمينات ويريله بيله جكنى ايضاح وبو مشكله سبيت
ويرن ماده ايسه ، چونكه انگلتره دولتك بونجه فداكارلق
اختيارندن صكره مصرى اويله حل اغتشاشده براقوب
چيقمسى كندو شاننه مرافق اوله ميه جغندن مصرى ايو برحاله
كتوروب آندن صوكره ترك ايتمى لزومى دركار ايكن
شمديدن بروقت معينه مصر ك انگيز عسكرندن تخليه سنى
انگلتره حكومتى دولت عليه قارشى تعهد ايتمش اولسه بو
ميعاد هر كسك معلومى اوله جنى جهتله وقت معينك تقربنده
اجنبى انتريقه لرى اثريله ينه مصر ده برقراريشيقلق وقوعى محتمل

ایدوکندن اول خالده عسکرینی مصرده ابقا ایش اولسه
 نقض عهد ایتیش اولهجنی واکرچه مصری اویله قزیشیق
 بر حالده براقوب عسکرینی کیرویه آلسه انظار عالمده چیرکین
 کورینه جکی ملاحظاتی مرحص مشارالیه ایراد ایدرک کندوسنجه
 بوکا تدبیر سالم کندوسیله برابر طرف دولت علیه دن مصره
 بر قومیسون کوندریلوب ابتدا سودان حدودنده واقع اصوانه
 عزیمتله اوراده سودانک اعاده آشایشنه دائر لزوم کورینه جک
 تدابیری برلکده اجرا ایلدکن صوکره مصره عودت واوراده
 دخی عساکر مصریه نك تنظيمی و محاکمک تشکیلی و اداره
 امور مصریه نك اصلاحی ماده لری دولت علیه قومیسریله برلکده
 قرارلشدیر بلوب اجرا اولمنسنى متعاقب مصرک انکلیز عسکرندن
 تخلیه اولنه جغنی تصریح ایشدر . مصوع حقنده اولان
 مطالعه سی دخی مشارالیه دن سؤال اولنغله جوابنده ایتالیا
 عسکرى بر آراق اورایه صوقلمش ایسه ده برشی یاپه میهرق
 اوراده تلف اولمقده اولوب بونک ایجون ایتالیا دولتی ایله
 سویلشمت لازم کله جکنی واکرچه مصوعی ترک ایلسی خصوصنده
 ایتالیا دولتی انکلتزه طرفندن اجبار اولنه من ایسه ده عندالایجاب
 بعض تشبثده بولیه بیله جکنی سویلشدر . بوکونکی اجتماعده
 بر ساعت قدر امتداد ایدن مکالمده ایراد اولنان مقدمات مواد
 معروضه دن عبارت اولوب مقدمات معروضه دن تغیرلری نه وجهله
 موقع مذاکره رسمیه قونمسی مناسب اولهجنی آرو آرو

تدقیق و مطالعه‌یه محتاج اولدیغی جهته مواد مذکوره بلامتدقیق امضا تحتہ آلمش اولماق ایچون پروتوقول تنظیمی اوکمزده کی جمعیه ایرتسی کونی قرارلشدیریلان اجتماعده بصیرت اوزره واقع اوله‌جق مذاکره‌یه تعلیق ایدلمشدر . بومکالمده موضوع بحث اولمق ایستیلان شی دولت علیه طرفدن مصره بر قومیسر ومصرایه سواکنه عسکر کوندرلماسی ماده‌لری اولوب قومیسر ارسالی موافق حال ومصلحت کوریلور ایسه‌ده عساکر شاهانه ارسالی مسئله‌نک کلیاتندن اوله‌رق بوبابده یالکزجه بیان رأی اولنمق صواب اولیه‌جغندن مجلس عالیجه برقرار اعطاسی اراده علیه جناب وکالت‌پناهیلرینه منوطدر اولبابده امر وفرمان «

۲۳ ذی‌القعدة ۳۰۲ و ۲۲ اغستوس ۳۰۱

امضالر :

کامل عاصم

ملاقات خصوصیه‌ده تمایلات بشقه شکلده ومکالمه‌ابتدائیہ‌نک ماهیتی اکا مطابق اولمه‌مغله برابرینه اسلم وحقوقه اوفق بر صورتده ایکن مرخصلرک اجتماعاتی تکرر ایتدیکجه وطوغریدن طوغری‌یه‌مقام سلطتدن آلمان اوامر تنوع ایلدیکجه مذاکرات وضع طبعیسنی دیکشدرمشدر . تفصیلاتی خاطر اتمک برنجی جلدینک ۹۱ نجی صحیفه‌سندن ۱۱۸ نجی صحیفه‌سنه قدر اولان قسمنده مضبوط اولدیغندن مکالماته صدارتک نظارتی وتشبثات وتصوراتمی بی ثمره وبی حکم براقق ایچون ظهوره کلان

مداخله‌لری بوراده تکرار ایتک عبث اولور . فقط مجرد سلسلهٔ مسئله غائب اولماق ایچون ایکی ماده‌دن بحثه لزوم کورورم : بزی کامل پاشا خاطراتک اون سکنرنجی صحیفه‌سنده موجود اولان ویوقاریده دخی یازیلان « او ائاده کندم اوقاف ناظری اولدیغم حالدہ خارجیہ ناظری عاصم پاشا ایله معاً بو مذاکره مأمور بویورلمش ایدم » عباره‌سنی تالی اولمق اوزره « فرداسی سنہ مسند صدارت عهدہٗ عاجزانه مه توجیه بویورلمسیله » عباره سیدرکه واقع حال مدلوله موافق دکلدر مشارالیه مرخص ثانیلکه تعیین اولدیغک ایرتسی سنه‌سی دکل او تعییندن یکریمی اوچ کون صوکره صدارته کلش ایدی . زیرا مرخصیتی ۱۲ ذی‌القعدہ ۳۰۴ تاریخنده وصدارتی ینہ اوسنه ذی‌الحجه سنک اون بشنده وقوع بولمشدی . تقدیر زمان‌ده‌کی سهوکه اهمیتی یوقسه‌ده مشارالیهک تاریخ صدارتندن برآی یکریمی بر کون صوکره یعنی ۱۸۸۵ سنہ میلادیه‌سی تشرین اولنک یکریمی دردنجی کونی مصره دائر عقد اولنان مقاوله‌که خاطراتک اوتوز برنجی واوتوز ایکنجی صحیفه‌لرنده مندرجدر باب عالینک مقررات سابقه‌سنه مغایرتی حتی بن صدارتده ومشارالیه مرخصلقده ایکن سفیر فوق‌العاده طرفندن ویریلوب مرخصلر من طرفندن باب عالی‌یه کوندریلان لایحه‌یه‌ده عدم توافقی حسیله بنجه اهمیتی حائردر . یوقاریده بیان اولنمشدی‌که بدایت مصالحته کوریلان استعدادات حسنہ مؤخرأ کسب

ضعف ایتشدی بونکله برابر سفیرک صدارتہ زمانندہ ویردیکی
 لایحه مؤخرآ عقد اولنان مقاولہ دن فرقلیدر . بو فرقاری
 بورادہ تصریح ایتکی بعض ملاحظات سیاسیہ دن طولانی
 تجویز ایتات ایستہم . سفارت فوق العادہ نک اولکی لایحه سی
 و آنک محتویاتی بیله مطلبمزہ موافق کورمیان مجلس وکلانک
 تعدیلاتی خاطر اتمک برنجی جلدینک ۱۱۶ ، ۱۱۷ ، ۱۱۸ نجی
 صحیفہ لرندہ عیناً مندر جدر . کامل پاشا زمانندہ عقد اولنان
 مقاولہ نامہ بی ده مشارالیه خاطر اتمک ۳۰ ، ۳۱ و ۳۲ نجی
 صحیفہ لرینہ قید ایتشار . ارباب دقت ایستر لرسہ بالمطالعہ فروقی
 تعیین ایدر لر .

کامل پاشا اون سکزنجی صحیفہ ده مسند صدارت عہدہ سنہ
 توجیه اولندقدن صکرہ باشلیجه مصر مسئلہ سیلہ اشتغال
 ایتدیکی و مصرجه اصلاحات لازمه دخی بروجہ مقاولہ
 اجرا قلندینی مقدمہ لر یلہ آتی الذکر بیانات مهمہ واعترافات
 عجیبہ ده بولنیورلر :

اخیراً خارجیه ناظری اولان سعید پاشا دخی مأموراً حاضر اولدینی
 حالده انکلترہ مرخصی سیر دورموند وولف ایله وقوع بولان ایلک
 اجتماعده (سعید پاشا اخیراً خارجیه ناظری اولنامشیدی کامل پاشا
 صدارتک بدایتدن نہایتہ قدر وحقی صکرہ لری ده خارجیه ناظری
 ایدی بوقرینہ ایله « اخیراً » کله سندن مراد سیر دوروموند وولفک
 سفاوت اخیرہ سی اولدینی اکلاشیلیور) مومی الیه برسؤال ایراد ایدرک
 انیکلنز عسکری مصردن چکیلدیکنده مصرده امنیت وآسایشی تحافظہ
 ایچون خدیوک معینده ایکی طابور ترک عسکری بولندیرمغه باب عالیجه

مساعدده اولنوب اولمیه جغنی استفهام ایلش وبو سؤال شایان مطالعه اولدیغندن اجتماع آتیده جواب ویریله جکی بالییان مسئله نك جهات سائرهنك مذاکره سنه ابتدار اولنش ایدی . فرداسی کونی حضور هایونده بولندیغ ائشاده انکاتره مرخصنك سؤالی درمیان اولنسی اوزرینه سلطان عبدالحمید ، مصرده دائمی صورتنده ترك عسکری بولندیراسنی اصلا جائز کورمیه رك ، اویولده مصره کوندریله جك عسکر وبونلرك استبدال اولندقه یرلرینه قائم اوله جق دیکرلری مصر تربیه سیله الفت ایدرك مملکتلرینه عودت لرنده بورای بکنمز اوله جق لری و مصری وطنداش لرنه وصف و حکایه ایله سائر اهاایده دخی مصره بر میل حصولنه بادی اوله جغنی جهتله بونده ملحوظ اولان محاذیر عدیده یه بناء تکلیف واقعك قبولی اصلا تجویز اولنمه جغنی جهتله یرولایتك تأمین امن و آسایشی اوولایتك مستحفظ عسکرینه عائد اولدیغندن بووظیفه نك دیکر ولایات اهاالیسنه تحمیلی عسکر پیننده شکایتی داعی اوله جغنی بیانیله سؤال واقعك جواب اعطاسی اراده بیوراش و چونککه سلطان حمیدك غلبه وهم ایله ذهننه تبادر ایدن رأیدن کندیسنی دوندیرمك قابل اولیوب ذاتاً کندم نظر شاهانه ده مصر تربیه کرده سی اولقله متهم ایدو کندن رأی هایونك تصحیحی امرنده صرف اولنان مساعی فوقنده ابرام ایله حتمده محل امنیت شبهه دعوت ایتمکدن ایسه اراده سنیه یه بالجبوریه اتباع اولنه رق انکاتره مرخصیله ایکنجی اجتماعده ملاحظات سنیه نك فقره اخیره سی بر زمین مناسب ایله بیان قلنمش ، یعنی تعبیر دیکرله عدم موافقت جوابی ویرلشدر . بونك اوزرینه سیردورمون دوولف ایکنجی سؤال اوله رق خدیو مصرك روم ایلدن کوکالی آرناود عسکری تحریر واستخدامنه مساعدده اولنوب اولمیه جغنی استفسار ایلسیله بو دخی دها زیاده تدقیقه شایان بر ماده اولسنه مبنی جوابی اجتماع آتییه بالتعلیق مواد سائر اوزرینه مذاکره یه دوام اولنش ایدی . فرداسی کونی ینه ملاقات سنیه یه ناغلیتله سؤال ثانی یی یاد ایلدیکمه ده بو صورت سلطان حمیدك مراقبه طوقونه رق

بر طاقم ملاحظات غریبه سردیله روم ایلیدن مصر ایچون اوله کوسلی
عسکر اخدی اوراده افراد مکلفه نك تناقصنه بادی اوله جغی جهته
قطعیاً جائز اولادیغندن او یولده جواب اعطاسی اراده بیورلغله ، حکم
اراده سنییه توفیق معامله ایدی . »

کامل پاشا حضر تترینک شکل بیاناتی تکلیف قبولی لزومنه
وخاقان سابقک ممانعتی نابجا اولدیغنه صراحة دلالت ایدیور .
اوحالده منفعت دولت طلب اولنان شیلرک قبولی طرفده بولندیغنی
ومقام سلطنت بوئلره مساعد اولنرسه دولتک منفعتی خلافتده
بر معامله یه وساطت ایتمه مک ایچون استغایه مجبور اوله جغنی
بیان ایتسی وینه طرف سلطنتدن ممانعت صورتی اظهار اولنورسه
استغایسی لازم گزمی ایدی؟ زیرا یالکیز حکیمات مشروطه ده
ذکک حکومت مطلقه ده و خصوصاً منسوب اولدیغمز دولتده
مصلح عامه یی درعهده ایدنلردن حفظ منعی مصلحته تقدیم
ایتمایلر هپ بویله حرکت ایتملردر . کامل پاشانکده
اواصوله اتباع و اخیار اسلافک مسالکنه امثال ایتلمری لازم
ایکن « حقمده محل امنیت شبهه دعوت ایتکدن ایسه سفیره
عدم موافقت جوابی ویردم » و کوکلو عسکر تحریرینی منعاً
خافان سابق طرفدن ایراد اولنان ملاحظاتی بر طرفدن ملاحظات
غریبه اولمق اوزره توصیف ایدرکن دیگر طرفدن حکم اراده
سنییه توفیق معامله ایلدم دیمسی تحیر و تأسفه شایان شیلردر .
شو اوضاع مطاوعتکارانه یی محافظه موقع املنه حمل ایتمی
حسب الحقوق تجویز ایتم بلکه حد ذاتنده دخی اولیه بر فکر

موجود دکلدر. فقط واجب الاحترام اولان مقام سلصته قارشى
 جمله مزك مكلف اولديغمز آداب تعظيميه جمله سندن اولميه رق
 مصلحت ومنفعت دولت خلافته اختيار ايدلمش اولان شوانقيادلك
 شائبة نبضكيريدينده خالى اولديغنى تسليم ايتمك قايل اوله ميور.
 حال اويلا ايكين مشاراليها يكرمى برنجى صحيفه خاطر اتنده
 پترسبورغ سفير اسبقى مشير شاكرا پاشا ايله بنى مزاج وافكار
 شاهانه يه خادم عباره سيلاه تعريف ايتمىنى مقاييسه نفسيه دن بشقه
 برشى ايله تفسير ايدهم. شاكرا پاشا بدايت نشأتندن خاتمه
 حياتنه قدر استقلال افكارىنى محافظه ايتمشدر. بو عاجز
 ايسه شاكرا پاشا مرحومك فضائل سائر سندن بي بهره
 ايسه ده استقلال افكار بحشده اوکا مشارك بولنديغى وبو
 خصيصه يني هيچ بر قوته قارشى فدا ايتديكمى تحديثاً للنعمه
 بيان ايدرم. مزاجه خادم اولسه هم صاحب اسنادك اوضاعنه
 امثال ايدر ومثلا ك زياده ناطق بالحق اوله جنى بر مسئله ده
 خاطراتنك اللى برنجى صحيفه سنده كوريلان «جهه عبوديت
 وتضرعات مملوكانهم نقش پاى ميا من پيمائى شهنشاهيلرينه موضوع
 اولدينى حالده عفو و مرحمت سنيه يه التجا....» كى اقوال
 مزاجشنا سى ايله استغفا يه بدل استبقايه سعى ايدردم.

بو مبحثه بر اهين كثره ايراد ايدسه بيليرسه هم ده كامل
 پاشا حضر تلى رنى وارباب مطالعه يي تصديق ايتمه مك ايچون بوندن
 صرف نظر ايدىورم. فقط خاطراتك ديكر فقراتندن بحشه

مجبور و بونلرک کلیاً خلاف حقیقت بولندیغنده مصرم ...
 کامل پاشا یکر می برنجی صحیفه ده دیورکه : « مسئله نك
 (مصر مسئله نك) کسب ایش اولدینی اهمیتت بیانیله کیفیت
 انجمن مخصوص وکلاده بالتذکر قرارینک خاکای شاهانه لرینه
 عرضی حقنده لدی الاستیذان شایان بیوریلان مساعدۀ سینه
 اوزرینه مابین هایونده اجله وکلا ایله عین اجتماعده سلف
 عاجزی سعید پاشا ایله پترسبورغ سفیر اسبقی مشیر شا کر
 پاشانک دخی بولندری اراده بیوریلهرق اوئانده حضور
 شاهانه ده بولنان مشار الیهما حضوردن حیقوب انجمنه کش
 اولملریله ذات مسئله تفصیلات لازمه ایله موضوع بحث و مذاکره
 ایدید کده انجمن هیئت انکلتردنک اغبرارینی ازاله ایله عقد
 اولنان مقاوله نك قبول واجراسنه دولت مشار الیهانی اماله
 ایچون دوشونیلان طریق توسطدن بشقه چاره اولمدینی رأینده
 متحد اولدینی حلد مزاج وافکار شاهانه یه واقف وخادم اولان
 مشار الیهما پاشالر بوتوسطدن موفقیت حاصل اولمزه ایمپراطور
 حضرتلری کند و سنی مشکل بر موقعه بولندیردیغمزدن طولانی
 منکسر اولهرق انکلتزه کبی آلمانیا دخی بزدن مغیر اوله جنی
 ملاحظه سیله او طریقه مراجعت موافق مصلت اولیه جنی رأینده
 بولنشلردر و اتفاق آرا ایله اولیان قرارلر اوزرینه اراده
 ویرمه مک سلطان عبدالحمیدک عادات متخذه سندن ایدی «
 دید کدن صوکره نتیجه ده « مسئله علی حاله قلوب بوصورتله خطه

مصريه نك انكلتره دولتنك اشغال واداره دائمه سی !! تحتنده
 قلمسینه بادی اولمشدر « تعبیریه کافه تقصیراتی عدم اتحاد آرایه
 تحمیل ایتمش و بوافاده ایله بر مخلص، برسند برائت بولدینی ظنه
 ذاهب اولمشدر. شو تیننات و تاویلاتده اخطاره شایان بر چوق
 شیر کوردم. اول او انجمنه داخل اولدیغ صحیح ایسه ده
 نه بن نه ده شا کر پاشا خاقان سابق کورمه مشدک. انجمنده
 حضور من ایسه کامل پاشانک بر عریضه خصوصیه سنده قوللانیدینی
 لسانه منی اولمیدر. زیرا خاطراتنک الی طقوزنجی صحیفه سنده کی
 کاغدی بوکا دلالت ایدیور مشارالیه صدارته مأموریتدن
 آلتی سنه سوکره مصر مسئله سنک کسب ایتدیکی وضعیتی
 نظر ابتهاجه آله رق ۲ ذی القعدة ۳۰۸ تاریخیه مورخ
 و خاطراتیه منتشر عریضه خصوصیه سنده « کرک ولی نعمت
 بی متمن ذات شوکتمات اقدمن حضر تلینه کرک دولت
 علیه ایله ملت عثمانیه قارشی بویله بر حالک مسئولیتنی قوللری
 یالکزجه تحمل ایده میه حکم » فقره سنی یازمشدر. ثانیاً آلمانیا
 ایمپراطورینک وساطتی انکلتره دولتی نزدنده مشر اوله منسه
 کنیدیسنی توسیط ایتدی کمزدن طولانی ایمپراطور بزه مغیر
 اولور کی هفواتدن معدود اولان بر سوز سویله مامش ایدم.
 بونی شا کر پاشانک سویلیدیکنی ده در خاطر ایده میورم.
 شمدی دیدیکم کی عادتاً هفوه منزله سنده اولان بر شیئی مقام
 رأیده کیم ایراد ایده بیلیر؟ مع مافیه قول ایله قائل بیننده نسبت

آرامش بیلہ آلمانیا ایمپراطوری یالکز عسکرلکده دکل علوم
 وقون متنوعده و سیاساتده یدطولا صاحبی و بناء علیہ زمانمز
 حکمدارلرینک الک بیوکی اولمغله آخر بر دولت نزدندہ
 وساطتی مشر و مؤثر اولوب اولمیه جغنی کندیسسی جملہ دن زیادہ
 تقدیرہ مقتدردر . حال اولیہ ایکن آنک دلاتنک عدم
 تأثیرینی بزلر نصل ونه حقله موقع احتمالہ قویابیلیرز؛ الحاصل
 آلمانیا ایمپراطورینک توسطی عقیم قله جغنی واوده بو ایشہ
 کندیسسی توسطی ایتدیکمز ایچون بزہ اغبرارینی دعوت ایدہ جکی
 احتمالہ بنای رأی ایتدیکمز کلیاً خلاف واقعدر . مخالفتنک
 اسباب موجبہ سی انجمن مضبطہ سنہ مربوط و طرفندن ممضی
 اولان ورقده تفصیل اولندیغی اوزرہ تجارب مادیہ مستند
 بعض ملاحظاتدن عبارتدر . شوراسی غریبدرکہ کامل پاشا
 حضر تلی بنم طرفندن یازیلوب مضبطہ یہ ربط اولتان رأی
 ورقہ سنی خاطر اتنک آلتشنجی و آلتش برنجی صحیفہ لرنده عیناً
 نشر ایتشددرکہ آندہ ادعا واسناد ایتدیکی مبحثہ دائر حرف
 واحد یوقدر . خاطر اتنک قارئلی طرفندن بوکا دقت اولنمش
 اولہ جغنه شبہ ایتمز سہ مدہ احتیاطاً ورقہ مذکورہ نک صورتی
 آتیدہ درج ایلدم :

« مصر مسئلہ سنک معلیتی نه قدر اوزار ایشہ مخاطره سی اونسبتده
 تزیایدہ جکی بداهتہ نظراً دہاز یادہ زمان کچمکسزین بر صورت تنظیمہ
 عقدی فرائض امور دن بولندیغی جای بحث و اختلاف دکلدر . فقط
 بیک سکز یوزسکسان درت سنہ سی حزیر اتنک اون بشی واون آلتیسسی

تاریخ لایله انکلتزه و فرانسه دولتری بیننده تعاطی اولنان تقریرلرده، انکلتزه حکومتی پولتیقه سنده هرکونا شک و اشتباهی ازانه ایتک اوزره فرانسه حکومتی طرفندن وقوع بولان بیاناته مبنی کند و عسکرینی بیک سکر یوز سکسان سکر سنه سی اوائلنده کیر و چکمکه موافقت ایدر، « عباره سی موجود ایدی . حال بویله ایکن انکلتزه برسنه صوکره موسیو وولفک مأموریتله عقد ایتدیکی ایلک مقاوله ده ، زمان تخلیه یی مسکوت عنه براتوب بوبابده ایلروده بر مقاوله یاییلمسی شرطنی علاوه ایتش ولورد غرانوویاک حسن فهمی پاشابه ویردیکی لایحه ده ، لدی الحاجه مصره طرف سلطنت سنیه دن قوه بریه و بحریه سوقی فقره سی موجود ایکن ینه موسیو وولفک و ساطیتله عقد اولنوب تعاطیسی تأخر ایدن ایکنجی مقاوله ده ، « وقت حاجتده دولت علیه ایله انکلتزه دولتنک مشترکاً مصرجه مداخله عسکریه اجرا ایللری » فقره سی قوللشدیر . بو صورتلر بومثالو تأمینات دولیه نك تغیر احوال ایله تبدل ایتدیکنی کویستریور ؛ و حتی خطه مصریه ده حقوق حکمرانی دولت علیه نك محفوظیتنی دولت مشارالیها مصری اشغالندن صکره تحریراً و مکرراً بیان ایتش ایکن ، شمدی تأمین حقوق ایچون سند جدید استحصالی احتیاجنده بولنلمسی دخی قضیه مشروحه یی مؤید کورینور ؛ بودفعه کی صورت تنظیمه نك حکمنه دخی حیلوت عوارض ایله خلل کلمه مک و یاخود تخلیه مقاوله سی مذاکره سنه کیریشلده کده شرائطی تشدید و یاخود زمان تخلیه پک زیاده تطویل اولنماق و دهها سائر مشکلات و مخاطرات حدوث ایتماک ایچون براساس امینه بنای حال ایدلمسی اعتقاد عاجزانه مه کوره الزم و مستعجل اولوب شیمدیلاک محفوظیت حقوقه متعلق تأمینات اخذیه اکتفا ایدیلوبده مقصود بالذات اولان تخلیه خصوصنی مقاوله آتیه یه تعلق ایلک مقصده موافق کوریه مدیکی جهته تأیید حقوق، تعیین زمان تخلیه مطلبلرینه برلکده تشبث اولنسی مطالعه سنده یم . انکلتزه تخلیه برمدت تعیینی تکلیف اولنه جق اولسه حکومت مشارالیهاردی متضمن اولان تقریر سابقه عطف ایله جواب ویره جکی

حفنده اکثریت طرفندن بیان اولنان افکار واقعامهم وشایان نظر
ایسه ده مذاکرهیه تشبث ائساننده صرفی طبعی اولان مساعی و لازم
الارانه کوربلان اسباب امنیت دلائله حکومت مشار الیهانک تقریر
سابق محتویاننده ثباتی برطرف اوله بیلهجکی ملحوظدر »

مادام که بنم رأیم کامل پاشانک رأینه توافق ایتهمش تعیر
آخرله قعدة کنیدیسه ترتب ایدن مسئولیته اشتراکی قبول
ایتمک ایستهشم . مشارالیهک بالمباحثه بی الزام وافحام
ایتمی و بونلر قابل اوله مزسه افادات طرفینی علی الاصول
انجمن مضبوطهسه درج ایتدیرمی واجب ایدی . کنیدلری
ایسه بونی پامدیلر . بالعکس بوطریق طبعییه بدل خاطرانتک
آلتمش برنجی صحیفهسندن آلتمش دردنجی صحیفهسه قدر اولان
اولان عریضه خصوصیه بی خاقان سابقه یازمش . شیمیدی ده
انکلتره حکومتی آلمانیا ایمپراطورینک وساطتتی قبول ایتزسه
ایمپراطورک بزه مغیر اولهجنی احتمالی کبی فرض و تقدیری
ممکن اولایان و ممکن اولسه ده مشارالیه ایمپراطورک بزدن دکل
انکلتره حکومتندن متأثر اولمسه و معناً بزه تزاید میلانسه سبب
اولسی لازم کلن برحالی مقام رأی وحذرده درپیش ایتدیکمی
ادعا ایلور . مشارالیهک بوکبی طرق مدافعهیه سالک اولمسه
جداً تأسف ایتدکدن صوکره ذات مصلحته نقل مبحث ایلورم :
خاطرانتک اوتوز اوچنجی صحیفهسندن اوتوز آلتنجی
صحیفهسه قدر محلی اشغال ایلین و « مصرک انکلز عسکریندن
تخلیهسه دائر ایکنجی دفعه انکلتره مرخصی ایله تنظیم وامضا

اولنوب طرف شاهانه دن تصديق وتعايطیسی تأخر ایدن مقاوله نامه صورتیدر « عنوانیه بدأ ایدن مقاوله ده علاقه دار اولان دولترلره شخصلردن هر برینک نقطه نظری بشقه ایدی . فرانسه دولتی بشنجی ماده مفصله ده مسطور اولان احوال محتمله دن کنایه « انکلتره دولتی احوال مشروحه ده مصره عسکر سوقه مقاوله حاضره ایله مأذوندر » وانکلتره حکومتی ایله حکومت عثمانیه دن کنایه « دولتین هر نه وقت مصره عسکر سوقی لزومی حس ایدر لرسه کیفیت یکدیگیرینه اشعار ایده جکلردر . واشبو مقاوله احکامنه توفیقاً حرکت ایله جکلردر » فقره لری خطه مصریه نك حقوق حاکمیتسه اشترا کدر دیهرك بونك عقدينه معارض بولنمشدر . خاقان سابق ايسه بو مقاوله بی تصديق ایده جك اولورسه فرانسه دخی دیگر بر حصه تضمین آله جغه وبوحالك بین الدول دائرة شمولی توسع ایده جکنه دائر علی الخصوص فرانسه دولتی طرفدن واقع اولان اخطار اتدن قورقه رق تصديق مقاوله دن اجتناب ایلنمشدر . سیر دوروموندو وولف وساطتیه استانبولده ایکنجی دفعه اوله رق تنظیم اولنان بو مقاوله دن انکلتره دولتنك مقصدی ده چونکه برنجی مقاوله یالکز بزملاه کندی بیننده عقد اولنوب دیگر دولتلرک تحت تصدیقلرینه کبر مامش اولدیغدن سویش قناله متعلق اولان نظریاتی ومصرک تعرضدن مصونیتتی یعنی حال بی طرفییه وضعی صاحب ملک عد اولنان دولت عثمانیه یه تصديق ایتدیردکن صوکره دول

سائر دنك دنجی تصدیق لری استیصال اینك ماده لری ایدی .
 وقتا كه بو مقصد لری مؤخرأ سوش قنالی مقاوله سی واسطه سیله
 حاصل ایتدی . آرتق ایکنجی مقاوله نك کندیسنجه حکم
 وئده سی قاننامغه تعاطی وعدم تعاطیسنی بر امر مساوی
 عد ایلدی . رئیس وکلا کامل پاشا ایسه وقت کچدکجه مخاطره
 تزايد ایتدیکنی تقدیر ایتکه باشلادی . فقط سیر دور و موندو ولفیه
 برنجی مقاوله یابیلیر ایکن انکلیر عسکرینك مقصدن چکمیسی
 ایچون تعیین مدت اولنماسی او مخاطره یه سبب اولدیغنی اقرار ایتیه رك
 مقاوله ثانیه نك تعاطیسنده کی تعللی هم دفع مسئولیته هم
 مقاصد اخرایه وسیله عد ایتشدرکه خاطراتك اوتوزیدنجی
 صحیفه سندن آلتش دردنجی صحیفه سنه قدر محلی اشغال ایلان
 عریضه خصوصیه لری هپ بو کاذالت ایدر . مقاوله نك ماهیته
 کنجه تعاطیسی تأخرایدن مقاوله کامل پاشا خاطر اتنده نشر اولمشدر .
 بشنجی ماده سندن آکلاشیلیورکه داخلاً ویا خارجاً بر مخاطره
 ظهوری امر تخلیه نك تأخیرینه لزوم کوستره جك اولورسه انکلیر
 عسکرینك او مخاطره نك ازاله سنه قدرینه مصرده قالمسی مقرر ایمش .
 داخلی ویا خارجی ظهور ایدیه بیله جك بر حادثه نك مخاطراتدن
 عد اولتوب اولنماسی ایسه ایوم مصری اشغال ایدن دولتک
 تفسیر و تقدیرینه تابعدر . بوراسی دوشونیلور ایسه مقاوله یه
 نه درجه یه قدر عطف قیمت ایتك لازم کله جکی تعیین ایدر .
 مع مافیه شا کر پاشا ایله انجمنه دعوت اولندیغمزده مقاوله بزده

کوسترلماش اولدیغندن شا کر پاشا مرحومک نه یولده تعریض
ایتدیکنی در خاطر ایدمه یورم. بن کامل پاشانک بودفعه خاطر اتنده
نشر ایتدیکی مطالعه نامه یی ویرمشم . بونک خلاصه مفادی
ایسه تأیید حقوق وتعیین زمان تخلیه مطلبلرینه برلکده تشبث
اولمنسی اخطاردن عبارت ایدی بونده مخطی اولمدیقم فکرنده
ثابت . کامل پاشا مقاوله نك تصدیقه حائل اولان احوالک
حدوثی کونندن بدأ ایدرک بر قلاج سنه او احوالی دفعه
چالیشدیغنی حالدہ خاقان سابقک عدم تصدیق حکمنده
دوام ایتدیکنی خاطر اتنده بیان ایدیورکه اللنجی صحیفه ده
موجود و ۲۲ تموز ۳۰۵ تاریخله مورخ عریضه خصوصیه سنده
کوریلان « مقدما تنظیم وامضا اولنان مقاوله نامه حقنده کی
حکم شاهانه باقی اولدجه » فقره سی ده حکم واقعی مؤیددر .
کامل پاشا خاطر اتنک اون طقوزنجی صحیفه سنده « سلطان
حمیدک غلبه وهم ایله ذهنه تبادر ایدن رأیدن کندیسنی
دوندیرمک قابل دکلدی » دیور. مشارالیه اوزمانده کی پادشاهک
ممانعتی و خاطر اتنه نظراً او ممانعته ایکی دولت قوه الظهر
اولدیغندن آنلری و کندیسنک بومسئله ده متباین المضامین اولان
معروضات خصوصیه سی که مسئله مصریه یی کاه احسن صورتله
حل ایده جکی وعدلرینی وکاه بوماده ناقابل حل بر حاله
کتیرلدیکندن بحثله تهدیدلری حاویدر. بونلری نظر مطالعه یه
الیوبده آلتی سنه سوکره تحت ریاستده منعقد اولان برانجمنده

بحق وبالطبع بیان ایتش اولدیغ برآیه تحمیل تقصیرات ایسی
بر بویونک حقسرلقدرد . قاعده کنديسه ترتب ایدن مسئولیتی
بوشلرده قطعا صنع ومدخلی اولیان وحتى وقتیه دفع مخاطره
اسبابه قولاً دکل فعلاً مساعیسی سبق ایدن برآدمه تحمیل
ایتمکده کی حقسرلغده دقت ایتمه لم . خاطراتنده « ذاتاً اتفاق آرا
ایله اولیان قرارلر اوزرینه اراده ویرمه مک سلطان عبدالحمیدک
عادات متخذہ سندن اولمغه مسئله علی حالها قالب بوصولرتابه
خطه مصریه نك انکلترده دولتک اشغال واداره دائمه سی !! آلتند
قلمنه بادی اولمشدر » عبارہ لریله بر حکمدہ بولمنی جلب دقت
ایتمامک قایل دکلدر . بو ، ادنی ملابسہ دن استفاده ایله ویرلمش
بر حکمدر که قاعده نصف ملتزم دکلسه ارباب عقول واذعانہ
کوره مطاع اولان قاعده منطقیه بطلاتی درحال امضا ایدر .

برقرارک اجراسنده اتحاد آرا آوامق سلطان مخلوعک
عادتق ایدیه شعاعات ، باطل اولدیغنی وهرشیده اکثریت نافذ
اولدیغدن اوکا اعتبار ایتمه مک امور دولتی تعطیل ایتمک دیمکدر .
حقیقتی افهام ایتمک وثمر اولزسه ایشدن چکیلمک لازم
کزمی ایدی . نته کیم بونی یاپانلر اولمش واکثریتک حکمنی
دائماً موقع اجرایه کتیرمشلردر . مجلس وکلاضطری واوراق
سائرہ بونک شاهدیدر .

ملاحظات سابقه یی بشقه صورتلرلده تکرار وایضاح
ایده ییم : تعاطیسی تأخرایدن ایکنجی مقاوله نك محرمانه برذیلی ده

اولماید که کامل پاشا بونی خاطراتنه علاوه ایتماش . او کورولسه
ایدی مقاوله نك ماهیتی دهها زیاده تعیین ایدردی . ذیل حقنده
بیان فکردن صرف نظرله دیگر بر ماده مهمه جالب انظار
ایدرم . مقاوله ثانیه ایضاحات لازمه دن خالی اوله رق خاطراته
کچیرلدیکندن بونی بوحالده اوقویانلر مؤخرأ واقع اولان تحولاتی
بالطبع خاطرلرینه کتیره مزلر ، مقاوله نك بزجه تصدیقندن
امتناع ایدلمسی انکلتزه حکومتك ده بونی معمول به عدايتامسنه
سبب اولدیغندن ، بشنچی ماده سنده ایسه « اشبو مقاوله نك عقدی
تاریخنندن اعتبارأ اوچ سنه نك انقضاسنده انکلتزه حکومتی
عسکرینی مصرفدن چکه جکدر . » دیه بر فقره بولندیغندن کامل
پاشانك مقصدی مصرک انکلز عسکرندن تخلیه سیچون تعیین
اولسان زمانی اعاده ایتدیرمك ایمش ظننه ذاهب اولورلر .
« اگرچه اوچ سنه نك انقضاسنده داخلأ ویا خارجأ بر مخاطره
ظهوری امر تخلیه نك تأخیرینه لزوم کوستره جك اولورسه
انکلز عسکری بو مخاطره نك ازاله سنی متعاقب مصرفدن
چکیاه جکدر » دیده بر فقره بولندیغندن فقره ثانیه فقره اولای
مستقبلاً بعض اسباب احداثیه ضعفه دوشوره بیلیر دینلسه بیه
ینه شو تمهیدک نظر اعتبارله منظور اولمغه وجهأ ما استحقاقی
واردی بوفائده فوت اولمش حکمنی ویرلر حال بوکه حقیقت حال
اولیه اولمیوب بالکلیه بشقه صورتددر . شیمدی خاطراتده
تغیراتدن آزاده بر شکلده کوسترلمش اولان مقاوله بردها قاله

التمامق اوزره کامل پاشا زماننده حکمدن ساقط اولمشدر .
 مشارالیه خاطراتک ۵۶ ، ۵۷ ، ۵۸ صحیفه لرنده مسطور اولان
 عریضه خصوصیه مفصله سنده انکلتزه حکومتک مؤخرأ
 بومقاوله دن عدولنی و آنک اسبابی تفصیل ایتدکدن صوکره
 دیورکه : « انکلتزه دولتی شو حالده مصرک تخلیه سنه مدت تعیینی
 فکرندن فراغت ایلدیکی نمایان اولوب بوکاده فرانسه نك
 مداخله و اعتراضی سبب اولدیغدن کرچه انکلیزلرک معلوم
 و مجرب اولان طبع و طورینه نظراً ، کندولرینه تحویل مسلك
 ایتدیرمک امکانی کوریه مه مکده ایسه ده ، بوباده دولت علیه
 قارشو فرانسه حکومتی مسئول اولمسیله انکلتزه دولتی نزدنده
 اجرای تشبثات دوستانه ایله مرضی عالی جناب جهانبانی
 دائره سنده برقرار حصوله لوردسالسبوری بی اماله یه فرانسه توسط
 اولنه رق ، بوندن بر حسن نتیجه حاصل اولور ایسه فهپا ،
 اولمدینی تقدیرده وقت مرهوننده انکلیز عسکرندن تخلیه سی
 خصوصنه دولت علیه ایله انکلتزه حکومتی بیننده برقرار ویرمک
 شرطیه مصر اوزرنده اولان حقوق سلطنت سینه نك محافظه
 و تأمیننه مدار اوله جق قیود لازمه ایله بر مقاوله نامه عقیدینه
 تشبث اولمسی ضروری اوله جفی تخطر اولمشدر . « مشار -
 الیهک شمو عریضه خصوصیه سی ۹ ربیع الاول ۱۳۰۸ و ۱۱
 تشرین اول ۳۰۶ تاریخیه مؤرخدر . پترسبورغ سفیر اسبقی
 شا کر پاشا ایله بن ایسه بوندن سکزر آی صوکره انجمنه

دعوت اولمشدق . اكر انجمنده اولجه انكلتره دولتي طرفدن
تصديق اولنديني حالده بزم طرفدن تصديقنده تاخير وقوع
بولان مقاوله شيمدي انكلتره حكومتجه كآ لم يكن عد
ايديلور بومعامله نك رفعنه يعنى عقدواقعتك معمول به طوتمسسه
انكلتره دولتي اماله ايتك ايچون آلمانيا ايمپراطورى توسط
اولنه جقدر ديمه مذاكره جريان ايتسه ايدى بو كى بر
رأيه اشتراك تكليفى بر مرتبه يه قدر معقول كوريلردى .
حال بوكه انجمنك ودها طوغريسي رياستك طلبى بشقه شكلده
وقوع بولمشدى . اوده او انجمنك اجتماعدن سكر آى اول
خاقان سابقه يازديني كاغذك تصديق مضمونى ايدى . يعنى
مصر ك انكلز عسكرندن تخليه سى وقت مرهونه تعليق اولنق
اوزره شيمديك مصر اوزرنده حقوقى تصديق ايلسنى
انكلتره آلمانيا واسطه سيله تكليف ايتك ايدى .

ايشته كامل پاشا بندن بويله بر رأيه مشاركتى طلب
ايدى كه جهت جهت غير مقبول ايدى .

حال حاضرله ثابتدر كه انكلتره خطه مصر يه اوزرنده حقوق
حكمرانيمزى غير منكردر . وحد ذاتنده دخی بو حق
متنع الاعتراضدر . لکن كامل پاشانك ديديكى يولده بر تشبث فكرمه
كوره ذاتاً معترض فيه اولميان بر حقى اضعاف ايده بيليردى . بوراسى
تسليم اولنسه بيله ذات مصلحت بر حكمدار معظمى توسط تكليفنه
محتاج دكلدى زير اصرف نظريات عائد اولان تأييد حقوق مطلبنى

واسطه سز بیه استحصالد کوجک چکیلمز ایدی . حتی امنیت
مقابله اسبابنه بزم طرفدن اعتنا اولنسه انکلتزه جه مؤخرأ کائن
لمیکن عدایدیلن مقاوله یی اعاده بیه قابل ایدی بناء علیه کامل پاشانک
رأینه اشتراکده بالطبع اعتذار اولنمشدی . بن تأیید حقوق وتعیین
زمان تخلیه خصوصارینه برلکده چالیشلمسی رأینده بولنمشدیم .
کامل پاشا اگر بنم رأیمک بطلاننه ، کندی اجتهدینک صوابنه
قناعت حاصل ایتش ایسه نزد سلطنتده اصرار وعدم تأثیری
حالنده استعفا ایتلی ایدی . آلمانانک توسیطی مسئله سیله
تلاقه سی یوق ایسه ده کامل پاشا خاطر اتنده کی بر فقره ایله
مناسبت مغویه سی اولدیغچون بوراده بر استطراده بونه جغم .
خاطراتک یکرمی ایکنجی صحیفه سیله آنی ولی ایدن صحیفه ده
کامل پاشا دیورکه : « مصر مقاوله نامه سنک عقدینی متعاقب
فرانسه سفیری قونت دومونته بلو برکون باب عالی یه کلدیکنده
اشبو مقاوله نک شرائطی آئی اولمدیغی بیان ایسی اوزرینه
انشاه تونست دخی فرانسه عسکرندن تخلیه سی ایچون یقینده
کندوسیله اویله بر مقاوله عقدی املنده اولدیغی بالمقابله
سفیر مشارالیه افاده وبو مکالمه لری دیگر بعض سفرایه ده
حکایه ایش ایدم . مکر المانیا سفیری ماجرای دول متبوعه سنه
یازمش اولدیغندن برقاچ کون صکره سفیر موسیو رادویچ
پرنس بسمارقدن آلمش اولدیغی تعلیمات اوزرینه نزد عاجزی یه
کله رک - هر نه وقت باب عالی تونس حننده اولان تصویرینی

قوه دن فعله كتوره جاك اولور ايسه تشبثانده آلمانيا دولتك
مظاهرتنه اعتماد ايلسنى — مأموراً تبليغ ايشدر . « كامل پاشاتك
شو ايقاظاتى حقنده ديه جكم سوزلر شونلردر :

۱۸۸۵ سنه سى شياطنك يكرمى ايكنجى كوفى لوردلر
محاسنك اجتماعنده لورد غرانويل « پرنس بسماركك مصرده كى
پولتيقه مزه غير مساعد كورنمى مصر لى ضبطى حقنده انكلتره دولته
ومقدما لورد بيقونسفيلده ويرديكى نصيحتى اصغا ايتديكمز ايجوندر »
ديسميله پرنس بسمارق ده سنه مذ كوره مارتنك ايكنجى كوفى
پارلمنتوده غرانوويلك اقاداتى جرحاً اوزون بر نطق ايراد
ايتمشدى . بسمارق بونطقنه « معتادم خلاقه اوله رق بعض
مكالمات محرمانه دن علناً بحث ايتمكه مجبور اوله جغم » مقدمه سيلاه
باشلار و بزم ايجون اك مهم محلى آتيدى كى فقرات تشكيل
ايدر : « مصر حقنده نصايحيم ايتنلديكنده مصرده سلطانك
بر مستأجرى كى بولنمليسكنز تعبيرنى قوللانديغم لورد غرانوويلك
خاطرنده اولق كر كدر . بو صورتله هم فرانسه يى هم ده ذول
سائره يى كوچندير مز ايديكزده ديدم . انكلتره ايله فرانسه نك
مناسبات حسنه ده بولنملرى بزجه پك زياده آرزو اولتور .
زيرا بو ايكي دولت بيننده كى مناسباتك انقطاعى عموم اوروپا
وعلى الخصوص المانيا ايجون بر داهيه در . بناء عليه انكلتره ايله
فرانسه نك مناسبات حسنه ده بولنملرى عنده پك قيمتداردر »
موزوروس پاشا لورد غرانوويلك نطقندن طولاي باب عالينك

نظر دقتی جلب ایتدیکندن بن خارجیہ نظارتی واسطہ سیہ
دکل بالذات و صورت خصوصیه وزمین مناسبده موسیورادوویجه
بوندن بحث ایتمش ایدم . آنک اوزرینه پرنس بسمارق حقیقت
حالی ایضاح یولنده سفارته اوزون بر تحریرات کوندرروب
مندرجاتک صدارته تبلیغی و آرزو ایدهرسم بر صورتک دخی
اعطاسنی سفیره امر ایتمش ایدی . تحریرات ۱۵ مارت ۸۵
تاریخیله مورخ و ترجمه سی ترجمه اوطه نده محفوظدر . احتمال که
کامل پاشا حضرتلری مصر اوراقی تتبع ایتدیکری صرده
یونی کورمشلردر .

استطراadden مقصدم شونی آکلاتمقدر که آلمانیاک فرانسه
ایله مناسبانه پرنس بسمارق بیوک بر اهمیت ویردیکی پارلمتوده
شویانایله ده ثابتدر . حال اوایله اولونجه نصل اولورده بسمارق
« هر نه وقت باب عالی تونس حتنده اولان تصویرینی قوه دن فعله
کتیره جات اولورسه تشبثاتنده آلمانیا دولتنک مظاهرتنه اعتماد
ایسنی » بزه تبلیغه سفیرینی مأمور ایدر ؟ مکر که ایشک ایچنده
غلط فهم وافهام بولنه یاخود اوایله بر تبلیغ معال بالاغراض
اوله . بونلری ایسه غیر محتمل عد ایتدیکمدن بالضروره
ومع التعجب کامل پاشاتک افاداتی غلطن عاری اولدیغنه قائل
اولورم فقط شو خاطره قصره یی علاوه ایدرم که وقتیه پرنس
بسمارقدن اوایله بر مظاهرت جلب ایدلمش ایسه جالبه مدار تفیخر
اولور . لکن تونسک استردادینه ممائل تصورات خصوصا حال

حاضرده افکار ناسی خیالاته سوق ایده جکندن دولت ایچون
مضر در. مادام که مناسبت کمشدر استطراد سالفه ضمماً دیگر بر ماده
استطرا دیه دنده بحث اولنور: کامل پاشا وقایع معلومه مصریه نك
تاریخی یازار کن اون آلتنجی صحیفه ده واردات مصریه انکلتزه
و فرانسه دولتری طرفدن تأمینات مقامنده قبول اولنه رق
بر صندوق تأسیس اولندیغندن بحث ایتشدر . مصر نك متبوعی
اولدینی جهته مصر نك احوال مالیه سنه نظارت ایتك دولت علیه نك
حقوقندن اولغله بوصندوقك اداره مجلسنده دولت متبوعه نك
قومیسری صفتیه بر مأموری بولنسی لزومی دولتره بیایدیر مش
ایدك. مساعی مدیده نتیجه سنده انکلتزه دولتی دخی داخل اولدینی
حالد دول مشار الیه نك موافقتلری استحصال اولنشدی
تفصیلی زمان مأموریتده یعنی ۸ جمادی الاخره ۳۰۲ و ۱۳ مارت
۳۰۱ تاریخنده مجلس وکلادن قلمه آلان و صورتی آتیده درج
اولنان مضبطه دن معلوم اولور :

« مصر دیون عمومییه صندوق قومیسوننده حکومت سنیه جانبندن
بر مأمور بولنسی لزومی بحثنده سفارت فوق العاده وداعه طرفندن
لوندزه قاینه توسنه وقوع بولان خطرات هر نصلسه مطلوبه موافق نتیجه
مادییه واصل اوله میوب موزوروس پاشاتك عهد قریبده انکلتزه
خارجیه ناظرندن جواباً بالاخذ بورایه کوندردیکی تقریرده دخی بوبابده
بعض مشکلات تمهیدیه نهایتاً مصلحت دیگر درلترک موافقتنه تعلیق
قلمش و بناءً علیه باب عالیجه دول سائر نك در سعادت سفیرلری نزدنده
وسفرای ساطنت سنیه واسطه سیله دخی محالیرنده بونك ایچون
مکالمات و مکاتبات لازمه اجراسنه لزوم کور نمشیدی . بوتشبتك

نتیجه سنده آلمانیا و روسیه و فرانسه و اوستریا دولتری طرفندن مذکور قومیسینده دولت متبوعه قومیسرینک بولنسی ایچون اتحاد افکار تحصیل و کیفیت رسماً باب عالییه تبلیغ قشش اولغله اوراقی لغاً عرض و تقدیم اولندی . مصلحت قومیسرک انتخابی خصوصنه قالدیغندن مجلس عاجزانه مزجه ایجاب و مناسبی لدی المطالعنه مذکور قومیسینک مذاکرات و معاملاتق فرانسزجه جریان ایتک و دیگر مأمورلری رابطهلر ذاتلر بولنق جهتیله تعیین اولنسه حق قومیسرک بولسانده ثانیاً مذکور قومیسینک شکل و ماهیتی ایجابجه امور خارجه ده معلومات و مهارتی اولنسی ثانیاً بورادن کیده جک ذات قومیسینک ایشلرینه ارتباط ظاهریسی اولیان متر مصالح پولتیقیه سیله ایشغال و بعض افکاره ایراث شبهه ایتک کبی احوال دن اجتهاب ایله مرکز دولت علیه صورت مناسبه و مهارتکارانه ده خدمت ایتک دقایقنی کوزتمکله قابل بولنسی لزومنه مبنی بونک مأمورین مسنده دن انتخابی موافق حال کوریلیمبور . مع مافیه ایش وضع اساسده اولنسه نظراً بوراسی حاصل اولدقدن صکره تعیین قلنه حق مأمورک لدی الایجاب تبدیلی دخی اسهل بولنش و مأموریت مذکوره ده المانیا سفیری طرفندن تحریرات اجنبیه کاتبی اسبق سرکز افندینک مأموریتی صورت خصوصیه و غیر رسمیه ده اخطار اولنوب دولت علیه قومیسرینک تعیینی خصوصنده کی مشکلات لوندره جه پرنس بسمارقک مخالفتنه تحمیل اولنمده ایکن مانعه مسروددنک بر طرف ایدلسی امرنده آلمانیا دولتنک و بوراده کی ایلچیسینک ابراز ایتدیکی آثار معاونت صمیمیه بناء سفیر مشارالیهک ترویج اخطاری شیمه مصلحته و معاملات آتیّه مماثلده دخی مظاهرندن استفاده ایتک مقصدینه موافق کورلشددر . چونکه مأمورمرزی دیگر دولتلر مأمورلریله سیان بر موتهه قویماق و مصرک احوال پولتیقیه سنه اکثریا منشأ اولان امور مالیه ده دائماً کسب اطلاع ایله مرکز حکومت سنیه ده بیلدیرمک ایچون قومیسر امپریال نام و عنوانیه کوندریله جکی کرک برلین و کرک دیگر قایینه تولره

وقوع بولان تبلیغاتره علاوه قلمش و آلمانیا ایلچینی دولت متبوعه سنک اساساً موافقتی بیان ایتدیکی صروده کیده جک مأمورک عنوان وصفقی حقنده دولت علیه نک تنسیب ایده جکی صورته ینه دولتنک موافقتی افاده ایلش اولدیغندن شو مطالعاته منبی مشارالیه سرکزافندینک بومأموریه تعیینیه خدیویه دخی تفصیلاته کیریشلمیه رک یالکز (مصرک دیون عمومیه صندوقی قومیسسیوننده دولت متبوعه طرفندن طوغریدن طوغریه قومیسر صفتیه بولمق اوزره مشارالیهک مأمورینه مجلس وکلا قراریه بالاستیدان اراده سنیه حضرت ملکداری شرفتعلی بیوریلوب بو دفعه اول طرفه کوندرلشدر) عباراتی حاوی تحریرات تسطیری مأمورک مسلماندن اتخابی تنسیب ایدن تجارت نظارتنک رأینه قارشو اتخاذ ایله تذکر قلمغله قاطبه احوالده امر و فرمان حضرت ولی الامر افندمن کدر .

کامل پاشا صدارته کلدکدن صوکره بو مضبطه یی مجلس وکلاده تکرار مبحثه قویمشدر . کندیلری دولت علیه یی سائر دولترلره منزله مساواتده طوته مه یز بناءً علیه صندوقده مأمورمن بولنسنه محل یوقدر دیمش ، اهل مجلس ده آکا اتباع ایتشلردر . بناءً علیه مساعی مصروفه هدر اولدی . صندوقده انکلتره و فرانسه نک مأمورلری بولنورکن مؤخرأ سائر دولتلر دخی مأمورلر تعیین ایتشلردی . حتی خدیو توفیق پاشا اول باول آلمانیا نک مأمور نصب واقعا د ایتسنه نقطه استنادیه سی نه ویا خود نره سی ایسه آکا بناءً مخالفت ایتدیکندن باب غالینک امریه بونی قبول ایتش ایدی . بو مأمورلر منسوب اولدقلری مملکتلرک اهالیسی ایچنده مصر تحویلاتنه صاحب اولانلر بولملری سببیه منصوبدرلر . تبعه

عثمانیه ایچنده ایسه تحویلات مصریه اشتران ایدنار یوق ایدی . صندوق اداره سنده باب عالینک مأموری بولمنی تحویلاته متعلق منافعی محافظه ایچون اولیوب مصرک احوال مالیه سنه نظارت ایتک ایچون اولاجقدی . « قومیسر امپریال » عنوانی بوکا دلالت ایدر . قومیسرک وجودی محمدعلی زمانده صادر اولان برنجی فرمانده دولتک مصر مالیه سنه نظارتی حتمده کی شرط که فرامین عالیله مفسوخ الحکمدر آنی اعاده ایدیوردی . انکلترة حکومتی دخی داخل اولدینی حالدده دول معظمه نك بو خصوصده کی موافقتلری بزم ایچون بر نوع موفقیت ایدی . باب عالی مأمورینک موقعی دیگر دولترلره مساوی حالدده قالمیوب بالعکس بر موقع ممتازی حائر واحوال مالیه یی وقت وقت دولته بیلدیرمک وظیفه سنی حامل اولدینی حالدده بورالرینک تقدیر ایدلما سنده کی اسباب دائرۀ احاطه فوقنده قالمشدر . اکر بو وظیفه مصر قومیسرلکی واسطه سیله ایفا اولتور دنیلیرسه اکا محل یوقدر . زیرا سیردورو موندوولفله یاپیلان برنجی مقاوله ده مندرج اولان دولت علیه قومیسرینک وجودی مقاوله نك تعیین ایتدیکی وظائف موقته یه منحصر ایدی . او وظائف نهایت بولدقن صوکرده انکلترة حکومتی قومیسر مزه ویریلن صفت رسمیه دائمیه یی طانیماش وبو معامله قواعد حقوقیه دخی موافق بولنشدر . بونک ایچوندر که ولایات سائرۀ عثمانیه اهالیسندن بولنان تجار وسائر ارباب حقوق

استیفای حقدہ مشکلاتہ اوغرایورلر . زیرا بونلر حکومت
مصریہ طرفندن مظهر حمایہ اولہمدقلری کبی انکلتزنک
اورادہ کی پوائتقہ مأمورینہ مراجعت مشروع واصولاً جائز
اولہمیہ جفتدن قومیسردن استعانہ ایتمکدہ درلر . او ایسہ
حکومت محلیہ نزدندہ تشبثات رسمیہ دہ بولنمہ نک محذور
معلومہ بناءً وساطتدہ تعامی ایتمکہ مجبور اولمقدہ در .

کامل پاشا خاطراتندہ ارمنی مسئلہ سابقہ سندن دہ بخلرہ
کیرمش وکندیسندن زیادہ بنم ایچون مدار استفادہ اولان
وثائق او مباحثہ الحاق ایشدر . لکن مرحوم جواد
پاشانک وکندیسنک صدارت لرنده کی حالاتی هر نصلسہ بنم زمانہ
اسناد ایلدیکندن آنلری بالضرورہ تصحیحہ مجبور اولیورم :
کامل پاشا خاطراتک یوز سکسانجی صحیفہ سندن دہ بنم صدارتہ
تعیینمدن اول خاقان سابق کندیسنی انکلتزنہ سفیرینہ کوندر دیکنی
حکایہ ایدرکن عصیان ایدن صامسون ارمنیلری حقدہ باش
کاتب ثریا پاشا شدیدالمال بر امر تلغرافی یازمش و بو مادہ
انکلتزنہ نک مداخلہ سنی دعوت ایتمش اولدیغنی کندیسنہ
سویلدیکندن و « بن اورولسون دیدی ایسہم قتل عام اولسون
دیمدم » دیہرک باش کاتب ثریا پاشانی ذم و تقییح ایلدیکندن دہ
بحث ایدیور . اوزمان اویلہ بر امرک صدوری بعض سفارتلردہ
شایع اولمشدی . ثریا پاشا صدارتم زمانندہ موجود اولسہیدی
بونک صحیح اولوب اولمادیغنی اوندن اوکرمہ نیلیردم . لکن

حق تعالی رحمت ایتسون تریا پاشا ارتحال ایتمش اولمغه حل شبهه قابل اوله مامشدی. بو دفعه کامل پاشانک بیاناتی کوندریلن امرک شدتند اشتباهه محل بر اقیمور. زیرا خاقان سابقک اوتاویلی سوزلری بونی اشرا بدن خالی دکل. شوراسی دقیمی جلب ایتمشدرکه صدارته تعیینمدن صکره اوچ آی مأموریتده قالدیغم حالدده خاقان سابق صامسون وقوعاتنه و او امره دائر کامل پاشایه سویلدیکی سوزلری بکا سویتمامشدی. خاطراته نظراً تبدل و کلا صره سنده [۱] خاقان سابق شورای دولت ریاستی سرقرنا واسطه سیله کامل پاشایه تکلیف ایتمش، اوده ماسبق احوالی تفکرله و کلا لقدن تحاشی ایتدیکندن مأمویت رسمیه املنده اولمادیغی و خارجه اوله رقی پادشاهه خدمت ایده سیله جکی جوابیله بونی کچیشدیرمش. بو جواب کندیسنک موقع اقتداره کلمت ارزوسنده اولمادیغنه دلالت ایدرسنده جواب مستغیانیه نی ناقل اولان فقره نك تا عقبنده یازدیغی سوزلر رأس کارده بولمق املنده دوام و او وقت خدمت صدارتده بولنان بو عاجزی اسقاطه اقدام ایتدیکنی کوستریور مشارالیهک بو تکلفاتی اختیار ایتلمینه حقیقه تأسف ایتدم. بو دفعه خاطر آتیه حقمده روا کوردکلری اسنادلرده شونلردز:

« از منی اختلالی کیتدکجه توسع ایدرک اناطولینک جهات سائرهنی صارمش و بوده دولتهجه بر غایله حکمنی آلمش

[۱] جواد پاشانک انفصالیله بنم صدارته تعیین صیره سنده

اولسیله انکلتزه ، روسیه و فرانسه دولتلی متفقاً بالمداخله
 آناتولیده اصلاحات اجرایی ایچون باب عالییه بر نوطه
 ویردیله « ترتیب کلام ایجابجه احوالک بنم مأموریتدن صوکره
 وقوعه حکم اولنور و بو ایسه بر درجهیه قدر بنی اتمام ایدر .
 حال بوکه زمانده استانبولده کی حادثه معلومه دن باشقه (خاطراتک
 برنجی جلدینه نظر) برشی وقوعه کلمه مشدر . ولایات شرقیه ده
 اختلالات ظهوری و مقدمات معلومه نک و قوعی کامل پاشا
 ایله خلقلری زمانلرده در دول ثلثه نک اصلاحات اجرایی ایچون
 مداخله لری و سفیرلرینک باب عالییه نوطه ویرملری ده سلفم
 جواد پاشا زماننده ایدی . بن بوشیلر اوزرینه صدارته تعیین
 اولندم و بعدالتعین بر چوق مشکلات و بلیاته اوغرا دم خاطراتک
 برنجی جلدنده تفصیل ایتدیکم اوزره بنجه بر بلیه حکمنی آلان
 صدارت مأموریتی عزمله و معزولیتدن صوکره کی تضییقات ده
 انکلتزه سفارتنه مراجعتله نتیجه نلشدی . بن بووقایعی شمیدییه
 قدر یالکنز خاقان سابقک غیظنه و مقربیندن بر شیخصک
 وضع و صحنه حمل ایدیوردم مکر کامل پاشا حاضر تلرینک یا کلش
 اخطار و ملاحظه لری ده تشدید غیظده عامل مؤثر اولمش .
 بونی کندیلرینک خاطراتندن بو دفعه استتاج ایلدم . خاطراتک
 یوز سکسان یرنجی صحیفه سننده صورتی مندرج عریضه
 خصوصیه لری علی الخصوص اونک فقرات آتیه سی دیدیکم
 شیئک برهانلر نندرز .

فقراتدن بری : « بوندن اوچ درت ماه مقدم یعنی انکتره نك بو مسئلهیه حین مداخله سنده اتخاذ تدابیر لازمه ایله بالمداغه او مثللو خطرناك اصلاحات تکلیفاتی وقوعنك اوکنی آلمق قابل ایدیسدهده ... الخ » دیگر فقره : « مع مافیه باب عالیجه طوغری بر مسلك اتخاذ اولنسه ظن عییدانه کوره دول ثلثه نك وباخصوص انکتره نك یا ککش اولان اعتقادلرینی تصحیح ایتک ممکن اولور. یوقسه آناطولیجه حقوق حکومت سنییه دیگر دولتلرک تشریکی اساسنك قبولی تقدیرده عهد قریبده عینی حال روم ایلی ایله جزائر بحر سفیدده وبعده ولایات سائردهده دخی وقوعه کله رک ... الخ »

دول ثلثه سفراسنك جوادپاشازماننده ویردکلی اصلاحات اداره لایحه سی قرق ماده یی و برابر اولان مودانوم ده برطاقم مطالبی حاوی ایکن زمانده جمله سی بش ماده یه انحصار ایتشدی. فقط خاقان سابق بونلری ده قبولده ثناعت ایتشدی . بو حال ارنیلری نومید ایدرک استانبولده ظهوریه برابر دفع ایدی لان حادثه معلومه یی ایقاع ایتشدیلر. مطالب دولیه نك اودرجیه قصریخی موفقیته عدا یتمک لازم ایکن خاقان سابقک عکسی نظرله باقمسینی لایقیله تقدیر حال ایدمه مسنه حمل ایتشدم. بوراده دخی تکرار ایدیم که مکر کوردیکم مشکلاتده کامل پاشا اخطار اتنك ده تأثیری وار ایش .

مشار الیهك خاطر اتنده یوز سکسان دردنجی صحیفه دن

یوز سکسان آلتنجی صحیفه یه قدر محلی احاطه ایلان عریضه خصوصیه سی مطالعه یه شایان اثر لر دندر . واقعا عریضه کنديسنك رأى ذاتینى مصور بولنديغندن وهرکس رأینده مستقل اولديغندن مندرجاتى بشقه صورته تفسیر ایتکه حقم یوقدر فقط طرز افادات حسب المزاج خاقان سابقك ذهنی تردید و تشویش ایتش اولمیدر . بونی اوزمان تشبثات اصلاحیه یی تعویق و حقمده سوء ظیقاتی تشدید ایلیندن استتباط ایدیورم . ایقاع اولنان مشکلات خاطر ایتك برنجی جلدنده مسطور در . (صحیفه عن ۲۶۲ الی ۲۸۳) .

ینه یوز سکسان آلتنجی صحیفه ايله یوز سکسان یدنجی صحیفه ده کامل پاشا بکا خلف اولدقندن صوکره حادث اولان احوال حقنده بر مقدمه تمهید ایدیور . بوکانظرأ اصلاحات قرارنامه سی زمان صدارتمده کویا سفرانك امضالری تحتنه الديرلمش ایش بنم عزلم اوزرینه کنديسنه ده امضا ایچون ارأه اولنش . کنديسی بعض ماده لره ایلشمش بونلر سفرا ايله بالاتفاق تعدیل اولنق اوزره قرارنامه یی امضالامش ، برطرفدن تعديله لزوم کوسترمك و دیگر طرفدن تعديلاتی آتی یه تعلیق ایدرلك قرارنامه یی امضا ایتك یکدیگریله قابل تألیف بر حرکت دکلسده بوبجئی توسیعدن صرف نظر ایدرم . آنجق دیگر ایکی فقره نك صحیح اولمادیغنده اصراره مجبورم . زمان صدارتمده اصلاحات قرارنامه سی امضا ایتدیرلمه مشدر . بونك کامل پاشانك

صدارتنده خارجیه ناظری ایله طرف دولتدن مأمور اولان دیگر
 برزات و سفیر لر بینده مشترکاً امضا اولندیغنی و قتیله فرانسه نك
 صاری کتابنده کور مشدم برده صاری کتابك محتویاتی واقعه
 مطابق ایسه ولایات شرقیه والیرنجه تبدل وقوع بولدیجه
 سفاردن استمزاج ایچون برتعهد تحتیه ده کیرلش ایمش .
 دیگر ماده یه کئنجه : کامل پاشا کردلرک اسلحه دن تجریدی
 طیقترلرینه کران کله جکنی و بوده بنم زمانده کی مقرر اتدن
 بولندیغنی سویلیور حال بوکه مسئله او یله دکلدردر . سفرا لایحه سنك
 یکر می بشنجی ماده سنده « حمیدیه سواری آلایلری نه اونیفورمه
 کیه جك نه ده سلاح طاشیه جقدر » دنیلمش ایکن باب عالیجه
 یازیلان فقره تعدیلیه ده « بو آلایلرک نظاماتی یکیدن یاپیه جقدر .
 اوقات تعلیمیه خار جنده البسه اکتسا ایتمه مک و سلاح
 طاشیه مق کبی قیود آتیده کی نظامنامه احکامنه متعلقدر . »
 دنیلمشدی . بو عباره کردلری اسلحه دن تجرید معناسیله تفسیره
 متحمل میدر ؟

بن صدارتده و کندیسی حال مغزولیتده ایکن کامل پاشا
 حضر تلری ارمنی مسئله سی ایچون خاقان سابقله مخابرات عدیده
 و عمیقده بولنش . خاطرات بونی ارانه ایدیور ، او مخابرات وسیله سیله
 لفظاً و معنأً بنی مؤاخذه ایتدیکی حالده ماسبقی تذکر ایتمه ملرینه
 متعجب اولدم . بو مسئله کامل پاشانك برنجی دفعه کی صدارتنده
 انکلتزه سفیری طرفدن کندیسنه اخطار اولنش ایمش ، روسیه

دولتی طرفدن ارمنی ایسیرینه دائر باب عالییه برنوطه ویرلمسی
 محتمل اولدیغندن بونک وقوعی تقدیرنده انکلتزه دولتی دخی
 حکومت سنییه برنوطه ویرمک مجبوریتده بولنه جغنی انکلتزه
 سقیری کندیسنه بیلدیرمش ایکن مداخله خارجهیه حائل اوله جق
 تشبثات جدیهیه همت ایدلمدیکی ۱۵۵ و ۱۵۶ نجی صحیفه لرده
 مندرج استیدان تذکره سی که کامل پاشا صورت خصوصیه ده
 عرض ایتمش ایش اندن نمایان اولیور . خارجی پولتیقهیه دائر
 مقام سلطنته ویریلان معلوماتده ، مسائل سیاسییه نک محاکمه لرنده
 وعراض خصوصیه نک شکل وادلرنده ایسه خاطر اتده نظر دقته
 چارپه جق برچوق بشیر وارددر . سیاست خارجهیه ایچون از جمله
 ۹۵ ، ۹۶ ، ۹۷ ، ۹۸ نجی صحیفه ده کی تذکره ارانه اولنه بیلیر .
 بونده صرب ورومانیا سطنت سنییه نک داخل دائره اتفاقی اولقله
 افتخار ایدر لر دینمکله اکتفا اولنیوب « روسیه دولتی اتفاق
 مثلث خارچنده بولند قجه آلمانیا و اوستریا دولت لریله تجدید معاهده
 ایله داخل اتفاق اولمغه سعی وتشبث ایده جکندن بوکا موفقیتی
 حالنده اولجه دولت علیه اشو اتفاقه داخل اولمش بولنورسه
 از جمله روسیه ایله دخی تدافعی بر اتفاق دائره سینه کیرمش
 اوله رق بووجهله دخی تعرضدن مصونیتنی تأمین ایتمش بولنور »
 دینمشدر . آکلاشیلور که بوکی تصوراتله صدارت ومافوقی خیالاته
 مستغرق اوله رق سیاست خارجهیه جه جدی هیچ برشی یانماش .
 بعض معروضاتک ماهیت عجیبه لرینه ایسه ۱۹۰ و ۱۹۱ نجی

صحیفه رده صورتی کوریان تذکره مثال کافی در . بونده
 « قریحه الهام صیحه حضرت خلافتناهیلهندن شرفصادر
 اوله جق ارادات سینه موافق حکمت اوله جعی جهته در حال
 انفاذ اوله جفی » عبارله لریله خاقان مخلوعک پک ممنون اوله جفی
 تعهداته گیرمشددر . صدارتک انتخابیه بر هیئت وکلا تشکل
 ایتسهیدی بیله او شرط وتعهدله کرک داخل کرک خارجاً
 افکار عمومیه یی تأمین ایتمک واعتراضات ومداخلات اجنبیه نک
 اوکنی آلمق ناصل قابل اولوردی .

کامل پشایوبیله بر فکر محالنه دن وجود ویرمش آکلایه مدم،
 مشارالیهک ۱۷۱ نجی صحیفه لرده برر قسمی مسطور اولان
 عریضه لری ده جالب نظر در . ۱۷۱ نجی صحیفه ده دینیلورکه
 « زوارک بنده لرنبجه عدم قبولی خلاف عادت ومغایر شعار نزاکت
 اوله جغه نظراً اراده بیورلدینی حالدله کلانلرک ذاتاً قیونک
 اوکنده بکنمکده اولان پولیسر طرفندن منع دخوللری اولی
 اوله جفی بیان قلمش ایدی فی الواقع اوله اراده بیورلمش
 اولمیدرکه کلن زوارک خانه عاجزییه دخوللری پولیسر
 طرفندن منع اولنوب ازجهله ایتالیا وبلجیقا سفیرلری دخی رد
 اولنمشددر . »

خاطره لرمه مراجعت ایدلسه معلوم اولورکه بن هر نه زمان
 زقغه چیتسه تمقیباته دوچار اولوردم . بو حال قدیم ایسه ده
 صوکره لری زوارک خانه مه دخوللرینی منعده قانیقیشلمشدی .

حتی بر کون روسیه سفیری بنی کورمکه گلشیدی خانه قیوسندن
ایچری کیرد کدن صوکره معهود مأمورلر ملاقاتدن منوعیتی
بیان ایدهرک سفیری بیله طیشاری چیقارمشلردی . مکر
بوجراتلر پولیسلر واسطه سبله منع زیارت امکانی خاقان سایقک
ذهننه القا اولندیغندن نشأت ایتیش بونی بودفعه کامل پاشا
خاطراتندن آکلادم .

خاطراتک یوزیتمشنجی صحیفه سنده کی فقره ایسه بنیده
اضرار ایتمشدر . بو فقره کامل پاشانک خاطراتنده صورتی
کوریلن عریضه خصوصیه سنده در : « وقوع تبدل ایله احباب
اغراضک مقصدلری حاصل اولمش ایسه ده ملاحظه سینه
وجهله برمدت بونلرک مفتریات و تعقیباتندن وارسته اوله میه جنم
بدیهی اولمسنه منی استراحت قلب شاهانه بی التزام ایله ترک
اختیارده یا سرای هایونک بر کوشه سنده ویاخود عکاده کی
جفتلک عاجزیده اقامتمه مساعد سینه استرحامنده بولمشم ... الخ . »
۱۷ صفر ۳۰۹ تاریخنده یازلمش اولان شو عریضه ده متضرعانه
وقرب سلطنته نیل ایچون مستمندانه وقوع بولان تشبث
اوزرینه باش کتابتدن کامل پاشایه یازیلان تذکرده ایسه
« سرای هایونده بر اوطه تخصیصی حقنده کی استرحام داور
اکرمیلرینه کلنجه سرای هایونده بولنانلر برر مأموریتله
مکلف اولوب برده باراده سنیه حضرت ملوکانه جلب اولنانلر
ویا خاکپای هایون ملوکانه عرض خدمت وعبودیت ضمننده

کنار مظهر تلطیف و اکرام اولوب سرای عالی ملوکانه ده
 بشقه بر صورتیه کیسه نیک بولمنسک امثالی اولمدیغی ... الخ »
 دینلمش خقان سابقک جوابی کامل پاشانک عریضه سنده قولانیلان
 لسانه نظراً ده معقولدر . فقط بونده ثبات ایتمهش و اخیراً
 بنی سراینده حبسه تشبث ایتشدی . بو تشبث اگرچه قدیم
 بر غیظ و انفعالک نتیجه سی ایسه ده کامل پاشا طرفدن تحریراً
 کوسترین استعدادک باعث جرأت اولدینی شکل حالدن آکلاشیلیور .
 زیرا صدارتی احراز ایتمش اولان بر ذات هر نه سیه مبنی اولورسه
 اولسون سرایده کندیسنه اوطه تخصیصی نعمت مخصوصه بیلیر
 واونی بالذات طالب ایدرسه اویله بر معامله نی امثالی حقه ده اجرا
 ایچون هم امکان هم ده جواز تصور ایتماکه مانع قالماز . خاطر اتک
 آخر صحافی اولان ۱۹۸ نجی صحیفه نیک صولک سطر لرنده کامل پاشا
 « قانون اساسینک اعلاقی متعاقب مسند صدارتده بولنان
 سعید پاشایه حسب القدرینه خلف اولیشم جزؤ ثانیده شرح و تفصیل
 اولنور » دیور . امور معلومه ده صراحت بر نکته مقابلنده در ،
 هرشی ایسه مقدرات الهیه دن اولمق اوزره وجوده کله جکی
 قضایای معلومه دندر . کامل پاشانک التزام ایتدیکی قید صریحدن
 یعنی بکاخلف اولیشنی « حسب القدر » تعیریله تعریفدن نه کی نکته
 مراد ایلدیکنی آکلایه مدیغم ایچون برشی سویلیه م .
 یالکز خاتمه اوله رق اونی بیان ایتلیم که کامل پاشا حضر تدر نه
 اندیشه یه باعث اولان مناظر احوال — که مصر و شرقی روم ایلی

مسئله لری ده او جهه دندرلر۔ کندی صدارت لرنده چیزیلان خطوط سیاسته وجوده کشیدی . اکر ماضیده کی تصور و تصویر لرنده شمدی غلط و یا خود خطا حس ایدیورلر سه تسلیم حقیقت فضیلتی اختیار ایتلیدرلر . صنع و مدخلری اولیانلری ، علی الخصوص او ایکی مسئله ایچون وقتیه آخر خط استقامت لر ارا نه ایدنلری مؤاخذه ده هم حق هم ده فائده یوقدر .

*
* *


کامل پاشا ۱۹۱۱ شجی صحیفه دن بدأ ایله خاطراتنک خاتمه سنه قدر آیدین ولایتی والیلکنه تعینندن طولای حاصل ایتدیکی تاثیراتی شرح ایدیور . خاطر لرده درکه مشار الیه از میره کیتد کدن صو کره بن ده تشدد ایدن اسباب مجبره اوزره ینه عائله منله بلاد اجنبه اسلامیه دن برینه هجرتم وعائله یه مساعدده اولنمز ایسه منفرداً اروپایه عزیمتم ایچون معلوم اولان واسطه تسهیلیه مراجعت ایتمش ایدم . او اثناده خارجیه نظارتنده بولنان توفیق پاشا وشورای دولت رئیس اولان سعید پاشا بر قاچ کره نزد مه کوندرلش اولدقلرندن انارله ملاقاتنک برنده کامل یاشانک مع الشده از میره اعزامی شعار حقانیت و بویله بر معامله یی ترویجاً مجلس وکلادن مضبطه یانسی وکلالتی صفتنه مغایر وامینتی مخل اولدیغی سویلشدم . مشار الیه مادن سعید پاشا سنرک صدارت کنز زماننده عرض اولنان اصلاحاته کامل پاشا اعتراض ایتدیکی حالده شمدی عکسی معروضاتده بولنسی

اغبراره سبب اولدی و مجلسجه ده بو حال استحقاق اولندیغدن
او دیدیککز مضطه یابادی مألده جواب ویرمیشیدی . بن
او وقت سعید پاشانک سوزلرینی بعض سوابقدن طولانی بر
نوع سعایتیه حمل ایتمشیدیم . حالبوکه مشارالیهک صحت قوی
خاطرات دلاتیهلہ تبین ایدیور . زیرا ادارهنک اصلاحه دائر
سفرای ثلثنک دولت متبوعه لری امرلریله ویردکلری
لایحه لر قرق ماده ی و برابر اولان خطرله ده ا برطاقم تکلیفاتی
محتوی ایکن بونلر اثنای مأموریتده بش ماده یه حصر وقصر
ایتمیشیدی . کامل پاشا ایسه یوقاریده ذکر کیلچدیکی اوزره
خاقان سابقه یازدیغی عریضه خصوصیه ایله او مقررات ضرورییه
بیله اعتراض ایلدیکی صدارته تعیین اولندقدن صکره یعنی
۱۵ جمادی الاولی ۱۳۱۳ تاریخی عریضه رسمیه سنده ولایتلرده
وقوعه کلان اغتشاشاتک دفعی ایچون در حال تدبیر مؤثره اتخاذ
ارلندیغی تقدیرده بین الدول برقونفرانس تشکیل اولنه جغی
معرض احتمالده عرض ایلدیکی خاطراتنک ۱۸۷، ۱۷۸، ۱۸۹ هجری
صحیفه لرنده کوریلبور . بو حالده سعید پاشانک سویلدیکی سوز صحیح
حقیقور . معافیه بیانات متباینه سبب انفصالی اولسه بیله بر ذاتی
رأی ورضاسی خارجنده مأموریته نصب ایتمک یک فنا برشی
ایسه ده کامل پاشانک اوصره ده تصادف ایتدیکی شدت
عزیمتیه برابر زائل اولدیغی و حتی از مبره کیتدیکنک آلتنجی
کونی تکرار استانبول جلیله صدارته نصیبی بیله تصور اولندیغی

مشار الیه خاطراتی نہایتندہ قید ایتشدہ . واقعاً صدارتہ عودت
تصوری خاطراتندہ نقل اولئان اسباب مانعہ حکمنجہ تأخر
ایتمشایسہدہ اون برسہ از میردہ معزلاً و مستقلاً چکیریلان وقت
بعضلر حقندہ سنہ لرجہ دوام ایدن و موضوع تعرض اولانلری
وعائلہ لری و حتی منسوبلری لذت حیاتدن و حوایج اجتماعیدن
محروم ایلان ترصدا ت و تعقیبات ایلہ مقایسہ ایدیلیر ایسہ برنجیسندہ
تسلیمیہ و کظم و غیظہ مدار اولہ حق برچوق شیر بولنور .
ایستہ کامل پاشا حضر تلرینک خاطراتی کہ مصممیت نشری
برسنہ یہ قریب زماندن بری مطبوعات ایلہ خبر ویرلمکدہ اولدینی
حالدہ بودفعہ ظہورہ کیشدر . بکا تعلق ایدن اقسامی حقندہ
شمذیلک جوابلرم بولردن عبارتدر .







3 1761 07130508 0

Sa'id Pāṣā, Mehmed
Sa'id Pāṣānın Kāmil Pāṣā
hātīrātına cevābları

DR

558

K34S3